

**Nzryr-krbz Pol Kx Ayrnrngr  
Mz Lr Korint  
Natq Ngr Nzaplxtqngr Mz  
Nzryr-krbz Pol Kx Ayrnrngr  
Mz Lr Korint**

Aposol Pol nide ncblo kx ryapwxtipx-kai Nr-pakxmrlz Korint, mz nzvzpx-krde krali, x dzbe lrmakxtr lc vzpxm mz nzwz-krde. ☆ Mz taon lc, tu elr madrka' nzklung. Lr Korint nzmng-zlwzng x nzmwimi-abeaneng leplz kx trngiu kernalzdrng. Mzli kc tzrlxngiti-ate-ngrdr, nqm̄q nr drtwrdr apubele kxnmnc-mrbrng. Lr Korint kxnzrlxngiting nzklung kxtrngiulrJiu, kx trpnzng scdr da, x kxnzawz-nrbalqng. A' kx nznginidr bcnyr nzpipzng. Nzaki-lzbqng murde kxnznginidr bcnyrng nzobqszolr kztedrng kx trpnzng scdr da. Kzdung kxnzrlxngiting lcong nzmwiming kxtrngiu kernalzdr. X nzglqpx-lzbqng mz zmatq ngr nzwzng kc tqkabz Mqn-grkxtr badr, myapxbz zmatq ngr nzycmne-ngrbz mz Gct mz natq lr mrkzbleng. Mz drtwrdr nidr leplz kxnzyrplapxng x kxnzbrpeng mz nzvz-nqblq-krdr Jisz. A' trtingr.

Pol yr-kaipzle kc letz mz lrmakxtr mrkc Korint mzli kc, x letz lc kc ate. Mz letz kc kai, pnanatile nidr mz nqm̄q krdr kxtrka. Zbz mzli kc tqmnc-ngrde mz taon Efisz, ncblo nztqng nztwzblzr bade kc letz kx nzatwzlr-ngrbz lr Korint. X mz

---

☆ : Aposol 18:1-8

letz lc nzayzlu-ngrbzlr natqdeng. Trkrlzkuu nike tqyrle mz letz kc kai. A' opx angidr kx lr Korint nzpxtpx-ngrdr natq Pol x nzbatrpzlr mz leplz nzyrlqpx-lzbq-krdr mz zmatq ngr nzngini-krde aposol. Zbz Pol sc tqayzlu-mopwzle natqdr mz letz lc, tqyrle mz mzlr yiz 54—55 AD mz nibr nzrmcngr mz Jiszs, mz nzvzpx-krde kratq.

Kxmule-esz' yrbzle letz kc kai, a' lr Korint kxnzrlxngiting kxnzkqlung nzvz-nqblqbelr nqm q nr drtwr lr Grik kxnzmnc-mrbrng. Mz drtwrdr, dalr nrlc trmyapxpwzu, a' dalr nqm q kxtr kx myapx-zlwz. Mz nzm-krde lcde, mrlzbz badr nzrmwimi-krdr kx trngiu kernalzdrng, murde nrkrdrdq ncblo ngi dalr nrlc ka. X drtwr lc batrpzle badr nzvz-rbr-krdr mz nzyrlzng x mz nztulzkr nrkrdrdq mz nzbzng. X mou, mz drtwrdr Pol trnginideu aposol, murde trycmne-aboipwzu badr mz natq kx rblx, a' natqdeng opx angidr. X Pol wz mz nzrtwz-krde trau, x takitrde kxetu nzbatr-krbzle mz leplz nzrka-krbzlr da bade. Mz drtwrdr nzryapwx-krbz Pol badr takitrde kxnzrlxngiti-ateng, x trtakitpedeu nidr murde nzrlxngiti-krdr brpe. A' Apolos, kc tqalvztrle nidr mz nibr Pol, mz drtwrdr vz-nqblqle nqm q kr kxetu mz da lcdeng, x nzvecpx-lzbqm qng mz Pol, mz nzvz-nqblq-krdr Apolos. Mz letz lc, Pol atubqtibzle drtwrdr lcng tqvz-rbr, mz natqdeng kxp q zlwz.

### **Mrkng Mz Letz Lc**

Lr Makxtr nzaki-lzbqng. [1:10-17; dckrlzde 3]

Mz drtwr kzdung leplz nzyrplapxkr Gct ngi dalr nzngqngungr. [1:18—2:16]

Kxnamu nzmncr Apolos badr lrmakxtr. [dck-

*rlzde 4]*

Lr Korint na-ayrplapxlr kxnzrlxngiting kcng  
tzapulr kxtrnzrlxngitiung. *[dckrlzde 5]*

Bzkq kxrlxngiti twzle kztede kxrlxngiti mz kot.  
*[6:1-11]*

Nrkrdrtdq kxnzrlxngiting sc Gct. *[6:12-20]*

Kxnamu nzyrlzngr kxtubq. *[dckrlzde 7]*

Kxnzrlxngiting bzkq nzmung dakxznng kx  
nzkabz mz drka'. *[dckrlzde 8]*

Aposol Pol nzaotikr drtwrde le kztedeng  
nzmyaszpxlr nide. *[dckrlzde 9]*

Kxnzmung mz madrka' nzangioldr kxtrngiu Gct  
angidr. *[10:1—11:1]*

Nqm q kx takitrde olvz ngr lrmakxtr. *[11:2-16]*

Kzdung da nzakipxlr kxnzrlxngiting mz Nz-  
mungrkxtr. *[11:17-34]*

Mqngrkxtr kabzle zmatq kxmyapxbzng mz  
kxnzrlxngiting. *[12—14]*

Jiszs tulz-mop mz nzbzng m nkrdrtdqde  
angidr. *[dckrlzde 15]*

Nzataktilr trau mz nzwzkr lrmakxtr x kzdung  
kz natq mou. *[dckrlzde 16]*

1-2 Ninge Pol kc tqkqle Jiszs Kxnzmcp x mz  
nzngini-krnge aposol nede, mz nzvz-nqblq-krde  
me pnz drtwr Gct. Nigr ncd r mzlegu Sostenes  
rpibzkr bamu kx, “Nimu la!” Ryrbo bamu, nimu  
dzbe lr makxtr ne Gct mrkc mz taon kxetu  
Korint. Gct kqlele nimu amrlx mz nzngini-  
krmu leplz kxtr nedeng kx nawztrpzng bade  
mz nzaxvctr-krbzmu mz Mevalu Jiszs, da kc  
tqwai-kzle mz kxnzrlxngiting amrlx mrkcng kqlu  
tzangioldr Kxetu rgu Jiszs. <sup>3</sup> Krka'-ngrne kx Trtegu

Gct x Kxetu rgu Jiszs nakabzlr bamu zmrlz ngrdr kxmyalz x nzmnc-zpwxngr.

<sup>4</sup> Awi-zvzbo mz Gct, murde kabzle bamu zmrlz ngrde kxmyalz mz nzaxvctr-krbzmu mz Mevalu Jiszs. <sup>5</sup> X mz nzaxvctr-krbzmu lc mz Kraes, dekc tqrngisc-ngrnamu zmatq kxmyapxbzng mz nzwztr-krbzmu mz Gct mz nzrkrlz-krmu nza-lvztrngr angidr, x mz nzpipx-krmu natq Gct. <sup>6</sup> X nzrngisc-krmu zmatq lcng atutrle natqngc mz nzpipx-krbo bamu da kx na-alebz Kraes bamu. <sup>7</sup> Dekc mz nzodutr-lxblr-krmu, tqkao-ngrbz Gct zmatq amrlx kcng tqtakitrde nzale-krmu nzwz-krde, mzli ka tqobqtipx-ngrnamu nyzylu-krm Kxetu rgu Jiszs Kxnzmcp. <sup>8</sup> X Kraes sa naokatrle nimu mz nztu-amqngi-krmu mz nzrlxngiti-krmu nakrlzbzle nzbz-krmu o nyzylu-krmle, murde natubqamu mz nzobq-krde mz Mzli kx tqmatq na-ayzlu-ngrbz Gct da mz leplz. <sup>9</sup> Gct sa na-angidatibzle da lcng bamu, murde yrlq-zvzle natq ngr nzesalz-krdeng. X sc tqkqlele nimu mz nzprtr-krmu mz nzodutr-krbzmu mz Mrlxde, Kxetu rgu, Jiszs Kxnzmcp.

### *Lr Makxtr Nzaki-lzbqng*

<sup>10</sup> Mzlengeng x inwengeng, mz zmatq ngr Kxetu rgu Jiszs Kxnzmcp, rngidrlvz-ngrbo bamu mz natqngc kx xplr kx naesakitxpe nzotabl-krmu. A' drtwrmu naesz'ti murde ma tqakipx-lzbqamu. <sup>11</sup> Mzlengeng x inwengeng, xlrk kx otablamu, murde kzdung leplz ngr ma nyz Klowi nzvzmqng x nzpimlr bange nrpa lc. <sup>12</sup> Xlrk kx kzdung nimu nzrpilr kx, "Ninge vz-nqblqx Pol." X kzdung nzrpilr kx, "Vz-nqblqx Apolos,"

x kzdu-kzng “Vz-nqblqx Pita.” X kzdu-moung nzrpilr kx, “Vz-nqblqx Kraes.” <sup>13</sup> A' vz-rbramu. Murde nigu amrlx nzaxvctrpzku mz Jiszs, x trpnzng r kx na-akipxle Kraes mz dzbede kxkqlu. Kzdung nimu nzrpilr kx nzvz-nqblqlr ninge. ? A' myx kxmule, ninge kc tqbzom mz kros mz nzarlapx-krnge nimu? ? X nzawrkxtrmu mz drtqng? <sup>14</sup> Trtingr! A' awitx-zlwzbo mz Gct kx trawrkxtrwxu nimu. A' awrkxtrtxpo Krispzs x Gaizs. <sup>15</sup> Dekc, trpnzng r kx narpile kx wrkxtr mz drtqng mz nznngini-krde oblamzng. <sup>16</sup> (Eu, a' sc tqdcpxppe mz drtwrng kx awrkxtr-kzx Stifanas badr lr ma nyzde. A' trpnzng r kx dcpkz mz drtwrng kx awrkxtrx.) <sup>17</sup> Trawrkxtrwxu leplz kxkqlu murde Kraes atwzlr-ngrmle ninge mz nzipix-krnge Nrpakxmrlz. X mz nzipix-krngele, trapuwxu ncblo kx rkrlz-angidr x aetu-lzbq mz nzymne-krde. A' yrlqkixle me mrlzkibzle nzxl-rkr leplz le, murde nayrplatitr angidr nardr. Murde ma tqrpwa'-ngrne zmatq ngr Nrpa ngr Kraes nzbzo-krmle mz kros mz nzarlapx-krde leplz.

### *Mz Drtwr Kzdung Leplz Nzyrplapxkr Gct Ngi Dalr Nzngqngungr*

<sup>18</sup> Mz drtwr leplz kcng tzo-zlilr lrpzki r Hxl, nrpa ngr nzbzo-krm Jiszs nidr mz kros ngi dalr nzngqngungr. A' mz drtwrgu, nigu kcng tzo-zlilr lrpzki r Heven, nrpa lc aelwapx-ngrmle bagu kxnamu nzarlapxng nigu mz zmatq ngr Gct. <sup>19</sup> Murde natq Gct rpil kx, “*Sa naodatix nzyrplapxkr kxnzyrplapxng, x sa nakatxpxbo nzrkr-*

*lzk* *kxnz**alvztrng*.” ☆ 20 Gct aovxiole nzrkr<sup>l</sup>zkr lr nrlc. Murde trpnzng<sup>r</sup> kxrlapx mz nzrkr<sup>l</sup>zkrde, o mz nzalvztr-krde mz Lou sc Mosis, o mz nzymne-angidr-krde. A' leplz amrlx nzrlapxng mz nzbzo-krm Jiszs mz kros.

21 Murde Gct yrplapx-esz'ngr x yr<sup>l</sup>qle drtwr kx trpnzng<sup>r</sup> kx nakrlzle nide mz nzyrplapx-krde esz'-krde. A' abrtzlvzle nzarlapx-krde leplz kcng tzlxngitilr nrpa kc tqyapwxtipxkr nigr aposol, kxmule-esz' mz nzobqkr leplz kxkqlu nrpa lc ngi dalr nzngqngung<sup>r</sup>. 22 Murde lr Jiu nzrlxngiting mz nzrmc-krdr r<sup>k</sup>x kxmatq. X kxtrngiulrJiu nzrlxngiting mz nzxl<sup>r</sup>-krdr da kx vz-nqblqle nzyrplapx-krdr. 23 A' trvz-nqblqkru drtwr lr Jiu o kxtrngiulrJiu lcng. Murde yapwxtipxkr nzbzo-krm Kraes mz kros mz nzarlapx-krde leplz. A' mz drtwr lr Jiu nrpa lc trngiu da kxmatq-esz'ngr x mz drtwr kxtrngiulrJiu ngi dalr nzngqngung<sup>r</sup>, x nzp<sup>x</sup>txpx-ng<sup>r</sup>dr r<sup>l</sup>ilrdr. 24 A' nigu kcng tqkqleng Gct, kxmule-esz' lr Jiu o kxtrngiulrJiu, glxku kx Kraes nide zmatq ngr Gct mz nzarlapx-krde nigu x ni-kzde nou drtwr kxyrplapx kx yr<sup>l</sup>q Gct mz nzarlapx-krde leplz. 25 Kxmule-esz' nrpa ngr nzatwzlo-krm Gct Mrlxde mz nzbzo-krmle mz kros ngi dalr nzngqngung<sup>r</sup> mz nzobqkr kzdung leplz, a' nzyrplapxkr drtwr lc tqyr<sup>l</sup>q Gct myaszpx-zlwzle nzyrplapxng<sup>r</sup> amrlx sc leplz. X kxmule-esz' mz drtwr kzdung leplz Gct trpnzng<sup>r</sup> scde zmatq murde tr-rpwa'-ngrpwzleu nznibqng<sup>r</sup> Mrlxde, a' zmatq ngr Kraes mz nzbzo-krmle mz kros myaszpx-zlwzle zmatq amrlx sc leplz.

---

☆ 1:19 Asaea 29:14

26 Mzlangeng x inwengeng, na-aoti ena drtwrmu nimu esz'-krmu. Murde mzli kc tqkqle-ngrbz Gct nimu, trkqluwamuu kxyrplapx mz nzobqkr leplz x trkqlu-kzwamuu kxnzetzung o kxnzvpzpxmqng mz nqvi lr ncblo kxnzmyapxbzng. 27 A' Gct mcpyle leplz kxnzkqlung kcng trnzsikluung, kxnzngqngung mz nzobqkr leplz, murde na-aelwapx-ngrbzle mz krkcng tzyrplapxng kx nzrkrlz-krdr trokatrleu nidr mz nzmnc-zpwx-krdr badr Gct. X mcpyle leplz txneng kxnzkqlung kcng trpnzngr scdr zmatq, murde na-aelwapx-ngrbzle mz leplz kxnzmatqng kx nzngini-krdr kxnzetzung x nzrngisc-krdr zmatq trokatrleu nidr mz nzmnc-zpwx-krdr badr Gct. 28 X mcpx-kzle leplz kx nzmaneng x kxnzobqszong mz nzobqkr leplz mz nrlc ka, murde na-aelwapx-ngrbzle mz lr nrlc kx da kcng tqmyapxbz mz drtwrdr ngi brmrda mz nzobqkr Gct. 29 Mz nzm-krde lcde, trpnzngr kx naglqpx-lzbqbz mz nzobqkr Gct, mz nzrpi-krbzle bade kx myaszpxle kztedeng. 30 Murde nzaxvctr-krbzku mz Mevalu Jiszs trvzpxpuu mz da kcng tqaleku x mz nqm qrgu, a' vzpxm mz nzwzkr Gct. Murde Gct yrlqle drtwr kxyrplapx, kx nangi Jiszs kx na-atubqtile nigu mz nzobq-krde. X Jiszs kc naokatrle nigu, murde nangingu leplz kxtr neng Gct. X ni-kzde kc naxpepxle nigu mz zmatq ngr alwx, murde namncku badr Heven. 31 Dekc tqrpinger Nzryrngrkxtr kx, “*Doa kx rpile naglqpx-lzbq, naglqpx-lzbq-ngrde nike alebz Kxetu rde bade.*” ☆

## 2

<sup>1</sup> Mzlangeng x inwengeng, nadcpx mz drtwrmu kx vz-nqblq-kzx da lc tqpipebo bamu. Murde mzli kc tqvz-ngrmc bamu mz nzyapwxtipx-krbo nrpa ngr Gct, trglqpx-lzbqpou bamu mz nzrpi-krnge kx ninge ncblo kxyrplapx x kxsiklu. X tryapwxtipxpou bamu mz nzapu-krnge ncblo kx rkrlz-angidr x aetu-lzbq mz nzymne-krde. <sup>2</sup> Murde aotype drtwrnge kx mzli kc tqmnc-ngrgu, naycmnetxtr-ngrpwo Jiszs Kxnmcp x nzbzo-krmle mz kros mz nzarlapx-krde nimu. <sup>3</sup> Mzli kc tqvz-ngrmc bamu, yangrngax x rnrcti-lzbqng mzmwxlr. ✧ <sup>4</sup> Nrpa kc tqyapwxtipxbo opx angidr x nzymne-krnge trapuleu natq ncblo kxrklz x kxyrplapx. A' nzyapwxtipx-krbole bamu vzmi da kx nzaelwapx-ngrdr zmatq ngr Mqngrkxtr. <sup>5</sup> Murde nzrlngiti-krmu ma tqtuoz mz nzyrplapx-krnge, a' natuopwz mz zmatq ngr Gct kc tqaelwapx-ngrde kx natqngeng amrlx da angidr.

### *Nzyrplapxngr Kx Vzpxm Mz Gct*

<sup>6</sup> Kxmule-esz' a' alvztr-ngrne nzyrplapxngr kx batrpz Gct mz leplz kx nzbrpeng mz nzrlngiti-krdr. A' nzyrplapxngr lc trvzpxpuu mz leplz o mz kxnzetung mz nrlc ka, mzli ka Kraes tryzluka-ngrmle. Murde zmatq ngr leplz amrlx sa na-aykrpxng mz nyzlu-krmle. <sup>7</sup> A' nzyrplapxngr lc tqpipxbo vzpxm mz Gct. Krlc drtwr kc tqyrlq-pnzle mzli kc nrlc trnzwzka-ngrde. Drtwr lc tqayc-kapqle nakrlzbzle nzvz-krm Kxnmcp. Murde mz drtwr lc tqyrlqle, na-axvctrpzle nigu

---

✧ **2:3** Aposol 18:9-11



mz Mrlxde, murde naprtr-kzku mz nzmyalz-esz'ngr-krde. ✧ <sup>8</sup> Trpnzngr kxnzeturung mz nrlc ka kx rkrly nzyrplapxngr lc. Murde nzmu nakrlzlrle, e trnztqlvztrlru Kxetu kc tqmyalz-esz'ngr mz kros. <sup>9</sup> Trnzrkrly-krdr lc tqrpi-kai Nzryrngrkxtr kx, *“Trpnzngr kx rmc x xlr da amrlx kcng tqoliqti Gct mz nzrka-krbzle mz leplz kcng tzmrlztilr nide. X trpnzngr kx aoti drtwrde da lcng.”* ✧ <sup>10</sup> A' Gct atwzlr-ngrmle Mqngrkxtr mz nzaelwapx-krmle bagu drtwr lc tqyrlq-pnzle. Murde Mqngrkxtr krlzle da amrlx, kxmule-esz' drtwr Gct kc tqyc-kapq. <sup>11</sup> Mqngr Gct esz'-krde kx krlztrpzle drtwr Gct, da kc tqwai doa, trpnzngr kx rkrlyztrpz drtwrde, a' ngi txpwz nide esz'-krde. <sup>12</sup> A' krlz-angidrku da kxmrlzting kcng tqkam Gct bagu, murde twzku Mqngrkxtr kc tqatwzlr-ngrmle, tqaelwapx-ngrmle da lcng bagu. Delc nzkrly-krgr drtwr ngr da lcng tqblepx-ngrbzle mz drtwr kxtrnzrlxngitiung. <sup>13</sup> X mz nzpipx-krbzku da lcng tqmrlzting, natq kcng tqpipxbzku kam Mqngrkxtr bagu. A' trnzvzpxpwung mz nzyrplapxkr leplz. Murde yokaetipxbzku da mz nzvz-nqblq-krde kxmu nzyokaetipx-krm Mqngrkxtr le bagu. <sup>14</sup> A' kxtrnzrlxngitiung nzpctxpx-ngrdr da angidr kcng tzvzpxmqng mz Mqngrkxtr, murde mz drtwrdr ngi dalr nzngqngungr. Trnzkrlyzlr nztwz-krdr drtwr ngr nzalvztrngr angidr lcng, murde nzmncpx-krm Mqngrkxtr mz nabz doa kxrlxngiti, dekc tqtwz-ngrde drtwr ngr nzalvztrngr angidr lcng x tqkrly-ngrde nzmrlz-krdr. ✧ <sup>15</sup> Kxnzrlxngiting nzkrlyzlr nzmrlzkr da

---

✧ **2:7** Efisz 1:9-14 ✧ **2:9** Asaea 64:4 ✧ **2:14** Sam 92:6

angidr lcnq, murde Mqngrkxtr mncpxm badr. A' rblxbz mz kxtrnzrlxngitiung nzkrly-zpwx-krdr nqm̄ nr drtwr kxnzrlxngiting. <sup>16</sup> Da kc tqwai nzpikr Nzryrngrkxtr le kx, “*Trpnznḡr kx rkrlz drtwr Yawe. X trpnznḡr kx takitrde nzyrlq-krbzle drtwr kx navz-nqblqle.*” ☆ Kxmule-esz' a' Mqngrkxtr kc tqmncpxm bagu okatrlle nigu mz nzvz-nqblq-kr̄gu me pnz drtwr Kraes.

### 3

#### *Nzaki-lzbqkr Lrmakxtr Aelwapx-ngrde Kx Nzrlxngiti-krdr Pobe*

<sup>1</sup> Mzlngeng x inwengeng, mzli kc tqmnc-ngrgu, trtakitrdeu nzymne-krbo bamu da kc tqwaibo mz leplz kcng tzvz-nqblqlr nzrmailzkr Mqngrkxtr. A' ycmnebo bamu mz nzapu-krmu kxtrnzrlxngitiung o kxnzrlxngiti-ateng. <sup>2</sup> Murde apubeamu itoto kx nzyqbeng x trnzmkang dakxnzng kxm̄ngi. Delc tqalvztr-ngrne nimu nzalvztrngr kcng kai, murde nzalvztrngr lcnq tqrblx, trnztakitrkaplr nimu. <sup>3</sup> Murde vz-nqblqbeamu lrpzki kc pnz tqikztiamu mz nzalezvz-krmu alwx. A' trmnclypwzmuu mz nzrmailzkr Mqngrkxtr. Opx angidr kx nqm̄ krmu apubele nqm̄ kr kxtrnzrlxngitiung, murde dobuti-lzbqamu x otabl-zvzamu. <sup>4</sup> X apu-kzamu nidr mz nzrpi-krmu kx, “Vz-nqblqx Pol,” o “Vz-nqblqx Apolos.”

---

☆ **2:16** Asaea 40:13

<sup>5</sup> Bzqkq akipx-lzbqamu mz nzvz-nqblq-krmu ninge o Apolos. Murde ngini-kzgr leplz x wztr-pzkr mz Gct mz nzokatr-krgr nimu mz nzrlxngiti-krmu, mz nzvz-nqblq-krde nzwzngr kc tqkamle bagr. <sup>6</sup> Mz nzwz-krgr lc, apux ncblo kc tqpe rtq kc tqngi natq Gct mz nabzmu. X Apolos apule ncblo kc tqpulilvzle rtq lc mz lue, mz nzalvztr-krde nimu. A' Gct kx rbatrpz mz rtq lc nzlvcpu-krde mz nzbtrtkr drtwrmu Jiszs. <sup>7</sup> Mz nzmu-krde lcde, ncblo kc tqyapwxtipx-kaile Nrpakxmrlz x ncblo kc tqalvztr-ngrde nimu nzalvztrngr angidr lcng mz nibrde, trnzmyapxpzung. A' Gct kxmyapxbz, murde nide kc tqbatrpzle nzlu-krmu kxmrna x tqaetunepxle nzrlxngiti-krmu. <sup>8</sup> Ncblo lcng li nzwz-krdr blepxngr mz nzvectr-krmlr leplz mz Jiszs. X Gct sa naxpele nidr navz-nqblqle kxmu nzwzkr ncblo kxes' mz nidr. <sup>9</sup> Da kc tqwai-kzle mz nigr ncdr Apolos. Wztrpzkr mz Gct mz nzale-krgr nzwzngr kc tqkamle bagr. Nimu doa neng Gct, a' trnginimuu doa negrng. Apuamu nrlanc nyz Gct x suti drtwrde nzlvclz-krm da kxmrlzting elr.

X mz kzdq mou nzymne-ebzpxngr, apukzamu kzdq ma kx atulz Gct nangi nyzde. <sup>10</sup> Mz nzngini-krnge aposol ne Gct, abzox nzatulzngr makxtr nyzde Korint, krlcde nimu leplz nedeng. Vz-nqblqx zmatq ngr nzlrmztrngr mz nzwzngr ma, mz nzyrlq-kai-krnge nou rplz ngr ma lc. Mz nibrde, leplz sc tzvz-mopqng mz nzwzngr mz ma lc mz nzalvztr-krdr nimu. A' na-aclvetio-lzbqng mz nzwzo-angidr-krdr mz nou rplz kc tqyrlq-kaix. <sup>11</sup> Murde da amrlx natuo mz nou rplz lc tqngi Jiszs Kxnmcp. Murde nide esz'-

krde lrpzki r nzarlapxkr Gct leplz. Bzkq doa kx rtwzm nzalvztrngr kzble mz nztekqtr-krde Jiszs nznigini-krde nou rplz angidr. <sup>12</sup> Nzwzkr kxnzrlxngiting kx nzatuong mz nou rplz sa namrlz. Murde na-apule nzwz-ngrng mz gol, silvz, x rplz kxlqlwx kxlqngipx, kx trpnzngr nzangcng. A' nzwzkr kzdu-kzng kxnzrlxngiting sa natrka. Murde na-apule nzwz-ngrng mz nounc, nabr, x lo. <sup>13</sup> Mzli kc Kxnzmcpix nayzlu-ngr-mople mz Mzli Kxmatq, nzwzkr leplz kxesz' sa naopx angidr. Murde nzwz-xliti-krde nzwzkr leplz nedeng sa na-apule nyr, x nzwzkr leplz kx nayc alo sa naprpxmqng mz nyr lc. <sup>14</sup> Doa kx wz angidr mz nike wztirole mz nou rplz, sa namcle kx nzwz-krdeng trnzngcu mz nyr. X Gct sa naxpele nide mz da kxmrlzting Heven. <sup>15</sup> A' doa kx nzwz-krdeng ngc x yrkrtox mz nyr, trpnz-moungr kx naxpengr Gct nide. Sa na-apule ncblo kx rlapx mz nzngckr ma nyzde, a' dztudeng amrlx yrkrtxong. Murde sa narlapx Heven, kxmule-esz' trpnzng. da kx naxpengr Gct nide mz nzwz-krde mz nrlc.

<sup>16</sup> Nakrlz-angidramu kx Mqng. Gct sc tqmnc mz mzlirmu, mz nzapu-krmu Mrkc Tqtr nyz Gct. <sup>17</sup> X Gct sa naodatile doa kx alvztr-rbrle nimu x akipxle nimu, murde atrkatile lrmakxtr nyzde. X nzodatingr lc Hxl tqyc tqyc. Murde apuamu Mrkc Tqtr nyzde, kcng tqamnc-bekapxleng mz nznigini-krmu leplz kxnztr nedeng.

<sup>18</sup> Bzkq esabrti-lzbqamu mz nwrpi-krmu kx yrplapxamu! A' doa kx rpile yrplapx mz nzobqkr leplz, natekqtrle drtwrde x narlrpx-ngrbzle mz leplz nwrpi-krdr kx nide doa kxnngqngu murde

vz-nqblqle nqmq kr Gct. Dekc nangini-ngrde doa kxyrplapx mz nzobqkr Gct. <sup>19</sup> Murde nzyrplapxkr leplz kcng trnzkrzlzru Gct mane mz nzobq-krde. Da kc tqwai nzrpikr Nzryrn-grkxtr kx, “*Gct yrlqle nzrkrlzkr kxnzyrplapxng mz nzapu-krde trtxki kc tqbatrpzle nzprtr-krdr elr*” ✧ <sup>20</sup> X kzdq kz Nzryrngrkxtr rpile kx, “*Yawe krlzle kx drtwr kx nzyrlq kxnzyrplapxng mane.*” ✧ <sup>21</sup> Mz nzmu-krde lcde, bzkq glqpx-lzbqq mz nzvz-nqblq-krm kzdq ncblo. Murde Gct kabzle bamu da kxmrlzting amrlx mz nzaxvctr-krbzle nimu mz KxnzmcpX. <sup>22</sup> Murde atwzlr-ngrmle ninge, Apolos, x Pita mz nzalvztr-krgr nimu. X wz-ngrde da amrlx mz nrlc ka mz nzokatr-krdr nimu. Kxmule-esz' luamu o bzamu, a' sa namrlzbx bamu. X kxmule-esz' da kx prtzbz bamu mzli ka o mzli kc navzm, a' sa nabatrpz Gct mz nzokatr-krde nimu. Da lcng amrlx scmung. <sup>23</sup> Na-aoti drtwrmu kx nimu doa neng Kraes. X nide txpwz kx takitrde nzmailz-krde nimu murde nide KxnzmcpX ne Gct.

## 4

### *Aposol Badr Lrmakxtr*

<sup>1</sup> Mz nzmu-krde lcde, nimu lrmakxtr na-apusr-ngrnamu nigr aposol badr kxnzacvlelr nimu kxnzawz neng KxnzmcpX. Nzwz-krgr kx nza-prcm bagr nzpipx-krbzkr drtwr kc tqyrlq pnz Gct mz kxnamu nzarlapx-krde leplz. Drtwr lc tqyrlq-kapqle mzli kc, a' mzli ka KxnzmcpX

aelwapxpe-ngrmle bagu. <sup>2</sup> X krlzku kx doa kxn-zawz kxmrlz na-angidati-zvzbzle natq Kxetu rde. <sup>3</sup> Kzdung nimu nzpibqtilr nzwz-krnge. A' tryc-zlwzu mz drtwrnge nzrpibqtikr leplz. Murde trtakitrdeu nzpwxliti-kz-krnge nzwz-krnge esz'-krnge. <sup>4</sup> Kxmule-esz' rpix kx trvz-rbrwxu mz nzwztr-krbo mz Kxetu rnge, a' trngiu drtwr kxtubq. Murde Kxetu rgu txpwz kx napwxlitile ninge. <sup>5</sup> Mz nzmu-krde lcde, bzkq pibqtiamu kxnzawz neng Kxetu, murde trkrlzkapzle mzli rde. A' na-aenzliamu nyzylu-krm Kxetu, murde krlc mzli r nzpwxliti-krde leplz amrlx. Mzli lcde, sa na-aelwapx-ngrde nqm q nr nabzgu kcng tzyc-kapqng. X sa napixle kxnzvz-rbrng x kxnztubqng mz nzobqkr Gct.

<sup>6</sup> Mzlangeng x inwengeng, ycmne-ebzpx-ngrbo kxpipz nigr ncd r Apolos, mz nzatubqti-krnge nimu. Navz-nqblqamu natq kc tqrpil kx, "Kx-namu nzaolvz-krmu leplz navz-nqblq-tpwzle da kx pi Nzryrngrkxtr," murde ma tqglqpx-lzbqamu mz nzrpi-krmu kx kzdq ncblo myaszpxle kzt-ede mz nzobq-krmu. <sup>7</sup> ? Nimu kxnzetzung kxnzmyapxbzng? ? Nzrkrzl-krmu myaszpxle kztmung? Trtingr! Murde nzrkrzl-krmung amrlx ka-nrbalqbz Gct bamu. Bzkq glqpx-lzbqamu. Murde nzrkrzl-krmung trnzvzpxpwung mz nimu esz'-krmu.

<sup>8</sup> ? Myx kxmule, rngiscpemu da kxmrlzting amrlx kcng tqsutu drtwrmu kx vzpxmqng mz Gct? Trtingr! Kxmule-esz' mz drtwrmu nzrlxngiti-krmu brpe x nimu kxnzetzung kcng trtakitrpedeu nigr aposol nzokatr-krgr nimu, a' esabrti-lzbqamu. Murde nzrlxngiti-krmu pobe.

Trapukru nimu mz nznngini-krmu kxnzetung. <sup>9</sup> Murde Gct rlr-ngrbzle mz leplz nzatrkatikrdr nigr aposol, mz nzapusr-krdr nigr ncblo kxnmncpxmqng mz presin kcng nanibqng. Doa amrlx nzmclr nzmyakr drtqgr, kxmule-esz' enjrl o ncblo. <sup>10</sup> Mz drtwr leplz mz nrlc ka, ngqngukr murde yapwxtipxkr Kxnmcpk kc tqbzom mz kros. X opxm kx trpnzngr scgr zmatq. A' mz drtwrmu nimu kxnzyrplapxng kxnzrngiscng zmatq ngr Gct. Rlr-ngrbzmu mz leplz nzamatq-krdr nimu, mzli kc tzobqszo-kzlr nigr. <sup>11</sup> Abzo mzli kc x sc tqvzbe, tqrmctitxbzkr dale, tqbz-ngrgr lue, x tqpxinekr lrpz kxbxpli. Nziklatinedr nigr, x trpnzngr me mnclvzo-ngrgr. <sup>12</sup> Mnc-xgle-tpwzkr mqgr esz'-krgr. Amrlzkr krkcng tzpilzlr nigr. X trayzlupwzkru da kxtrka mz krkcng tzatrkatilr nigr. <sup>13</sup> X ycmnebzkr mz nrwz mz krkcng tzpibqtilr nigr. Krlzmlc mzli ka leplz kxnzkqlung nzapusr-ngrdr nigr dcvi x brmrda.

<sup>14</sup> Tryr-ngrpou natq lcng murde na-amyati-ngrbo drtqmu. Trtingr. A' murde mrlztix nimu mz nzapu-krmu doa nengeng. X suti drtwrnge nzatubqti-krbo nqm q nr drtwrmu. <sup>15</sup> Kxmule-esz' rnginemu kxnzalvztrng kxnzkqlung, a' ninge tpxwz dela nangi trtemu. Murde yapwxtipxkaipo Nrpakxmrlz bamu, mz nzvzmi-krnge nimu mz nzlxngiti-krmu Kraes. <sup>16</sup> Mz nzmu-krde lcde, rngidrlvz-ngrbo bamu kx navz-nqblqamu Jiszs, da kc tqwaix. <sup>17</sup> Dekc tqatwzlr-ngrbo Timoti bamu. Murde nide mrlxnge mz Kraes, kc tqmrlzti-zlwzx. X krlzx kx sa na-angidatibzle me pnz drtwr Kxetu. X sa na-adcpk-mopwzle

bamu nzalvztr-krngeng amrlx x kxnamu nzmnc-krmu mz nzaxvctr-krbzmu mz Kraes. Murde alvztr-ngrne da lcng mz dzbe lrmakxtr kcng kqlu mrkcng tqalvztr-ngrne.

<sup>18</sup> Kzdung nimu nzglqpx-lzbqpeng, murde mz drtwrmu kx trpengr nyzlu-krbo bamu. <sup>19</sup> A' nzmu kx tqrlrpxngr Kxetu ninge, sa navz-anibo bamu. Mzli lcde sa namcx namrlzu r zmatq kc tqycbz mz leplz lcng tzglqpx-lzbqng, kx ngi zmatq ngr Gct o trtingr. <sup>20</sup> Murde zmatq ngr Gct trtuo mz nzymnengr, a' ycbz mz leplz kcng tzmncclzbzng bade mz nzngini-krde King rdr. X zmatq lc tqaelwapx-lzbq-ngrde mz nzale-krdr nzwzkr Gct. <sup>21</sup> ?Mz nzmu-krde lcde, nike suti drtwrmu mzli kc navz-ngrbo? O naplpxamu nzglqpx-lzbq-krmu, murde na-aodux nimu mz nivz. O navz zvz nzglqpx-lzbq-krmu lc, murde na-ayrplapx-zlwzx nimu.

## 5

### *Ayrplapxamu Kxnzrlxngiting Kcng Tzapulr Kx-trnzrlxngitiung*

<sup>1</sup> Drtwrnge talvzotx zlwz mz nzxlr-krnge kx rlr-ngrbzmu mz kzdq ncblo kx mwimile krnalz trtede nzmnc-lxblr-krmu badr. Da kxtrka lc, kxmule-esz' kxnzmnc-mrbrng murde trnzrlrpx-ngrdru da lc. <sup>2</sup> Rlr! ?Myx kxmule tqglqpx-lzbq-ngrnamu nzbrpekr nzrlxngiti-krmu? Nzmu navz-zlwzng drtwrmu alwx lc, x namaszrlrpx-ngrnamu ncblo lc, murde natekqrle nqm q nr drtwrde mz nzplzpx-krde alwx ngrde. <sup>3</sup> Kxmule-esz' trmncpou bamu mzli ka, a' ninge la tqmncbo bamu mz mqngrnge, mz nzaxvctr-krbzku mz



Mqngrkxtr. Delc mz zmatq ngr nzngini-krnge aposol, tqpq-zlwzng nрпи-krbole bamu kx na-ayrplapxamu ncblo lc, na-apule kx ninge kc tqmncbo bamu mrla. <sup>4-5</sup> Mz nzm-krde lcde, mzli kc tqyrlwr-lxblr-ngrnamu, namaszlrpx-ngrnamu ncblo lc mz nzmnc-lxblr-krmu badr, mz zmatq ngr Kxetu rgu Jiszs. Nakatxpxamu nide mz nzaclvekr Gct nide, x na-aprcbzm nide mz mq Setzn, mz nzatrkatikrde nide. X murde mw x elx, natekqtrle nqm q nr drtwrde x narlapx mz nzbz-alongr mz Mzli Kc Tqmatq na-ayzlu-ngrbz Gct da mz leplz.

<sup>6</sup> Namyangr drtqmu nzglqpx-lzbq-krmu mz nzbrpekr nzrlxngiti-krmu, mz nzrlr-krbzmu mz ncblo kxmule lc nzmnc-krde mz mzli. Nakr-lzamu kx alwx ngr ncblo lc, sa na-aprcatile kzdu-kzng leplz, nzm narlr-ngrbzmu nzmnc-krmu badr, da kc tqwai yisti kxpipzne nzayrlvz-krde flawa atwrnrngr kx nangi bret. <sup>7</sup> Mz drtwrgr, nigr lr Jiu, yisti ycmne-ebzpx-ngrde alwx. X mz nzvz-nqblq-krde nqm q krgr, katxpxkr yisti amrlx mz ma nyzgr, x sc tqakaputr-atemgr Nzamyangr mz nzngq-krgr bret kx trpnzng yisti ngrde. X mzli ka nalqngi-kzamu, mz nzkatxpx-krmu kxnaleng alwx mz nzyrlwr-krbzmu badr. Takitrde nzale-krmu da lc, murde Kraes alqngile nimu, mz nzngini-krde nei sip kx ngi blz kc tznibq mz nzarlax-krde nigu mz zbq ngr Nzamyangr. <sup>8</sup> Delc mzli ka tqmrlzng nzakaputr-krmgu Kraes nzngini-krde nei sip ne Gct, mz nzmncngr kxtubq kx apule bret kx trpnzng yisti ngrde. X nakatxpxku nqm q krgu kcng mzli kc

tqtrka, tqdrka'ngr, mz nzapu-krdr yisti. \*

<sup>9</sup> Mz letz kc tqyrbo bamu mzli kc, pipebo bamu kx bzkq prtrpzm badr leplz kcng tzmwiming doa kxtrngiu krnalzdr. <sup>10</sup> A' trycmnetr-ngrpou kxtrnzrlxngitiung kcng tzmwiming kxtrngiu krnalzdr, x tzkcmnz-ngrng, tzesabrng, x tzangioldr da kcng trnznginidru Gct angidr. Murde krlzx kx rblx nzyrlqpx-lzbq-krbzmu mz leplz kxnmulr lcng amrlx, murde nzmncng mz nrlc tulvzo. <sup>11</sup> A' ycmnetr-ngrbo leplz kcng tzrpilr nzvz-nqblqpelr Jiszs, a' nqm q krdr trka. Bzkq prtrpzm mz leplz kxnmulr lcng tzmwiming kxtrngiu krnalzdr, tzkcmnz-ngrng, tzangioldr kxtrngiu Gct angidr, tzrpibqting leplz, tzmng-zlwzng, tzesabrng, x kzdung kz da kxnmulr lcng. X bzkq mu-lxblr-kzamu badr, murde ma tzrpilr kx drtwrmu esz'ti badr mz nqm q krdr lcng tqtrka. A' kapx-lzbq-zvzmamu badr. <sup>12</sup> Trtakitrdeu nigu kxnzrlxngiting nzayrplapx-krngu kxtrnzrlxngitiung mz nqm q krdr lcng tqtrka. A' suti drtwr Gct nzayrplapx-krmu leplz kcng tzrpilr nidr lrmakxtr, a' sc tzvz-nqblqlr nqm q lcng tqtrka. <sup>13</sup> Murde Gct esz'-krde kx na-ayrplapxle kxtrnzprtrpwzung mz lrmakxtr. X rpile mz Nzryrngrkxtr kx, *"Maszlrpx-ngrnamu leplz kxdrka'-ngrng murde ma tzprtrpzlr*

\* **5:8** 5:7-8 Mz Nzryrngrkxtr kc kai, mzli kc lr Israel tzmnc-ngrdr Ijpt, Gct rpibzle badr kx narnibqng nei sip x mepyr ngrdr nakilvztrlr mz naonrx ngr ma nyzdrng. Murde enjrl kc nanibqle kzdung lr Ijpt namya-ngrde ma nyzdrng. Krlc Nzamyangr kc kai. [Nzrlaszng 12:1-36] X ngi kz rxx ngr Kraes nzbzo-krmle nigu mz kros. Mz Nzryrngrkxtr kc ate, nzrpibz 'Nei Sip ne Gct,' murde Gct ipqpxle alwx rgung mz nzyrleo-krm mepyr ngrde. [Mak 14:12; 1 Pita 1:19]

*bamu.*” ☆

## 6

### *Bzq Twzq Kztem Kxrlxngiti Mz Kot*

<sup>1</sup> Mz nzotablkr kxnzrlxngiting, bzq vzmbzmu nidr mz kxtrnzrlxngitiung mz nzokatrngr. A' otiamu dq kztemu kxrlxngiti mz nzokatr-krde nimu nzatubqti-krmu nzotablkrdr. <sup>2</sup> ?Myx kxmule, trkrlzwamuu kx mzli kc nayzlu-ngrm Kraes, nigu kxnzrlxngiting sa na-aclveku leplz amrlx mz nrlc? Mz nzmukrde lcde, takitrde kxnzrlxngiting nzatubqti-krdr nzotablkr kztedr kxnzrlxngiting. <sup>3</sup> ? X trkrlzwamuu kx sa na-aclve-kzku enjrl? ☆ Kx tqmule lcde, tr-rblxu nzatubqti-krmu da amrlx mzli ka mz nrlc ka. <sup>4</sup> Mz nzotablngr kxmule lcngr, takitrde kzdq doa mz lrmakxtr kxnzamatqng nzatubqti-krdele. <sup>5</sup> Rlr! Namyangr drtqmu! ?Myx kxmule, trpnzngr doa kxes' mz nimu kx narde mrlztipx, kx krlzle nzatubqti-krbzle da lcngr bamu? <sup>6</sup> Murde xlrk kx mzli ka kxrlxngiti delc tqtwzle kztede kxrlxngiti mz kot. X ngi da kx trka-esz'ngr, nzpibqti-lzbq-krdr mz mz kxtrnzrlxngitiung. <sup>7</sup> Nqmqr ngr nztwz-lzbq-krmu lc mz kot, aelwapx-angidr-ngrde kx vz-rbramu. A' mzli kznike kztem kxrlxngiti atrkati-ngrde nim o pnatibzle dztum, mrlzvxix trnztwz-krmleu mz kot. Murde mrlz nzrlrpxngr nzatrkatikrde nim myaszpxle nzovxiokr Setzn nimu rlilrmu mz nztwz-krmle

☆ **5:13** Lou Kcpwz 17:7 ☆ **6:3** Sam 149:9; Nzaelwapxng 20:6

mz kot. ☆ 8 A' apubeamu kxtrnzrlxngitiung, mz nzangqnguti-krmu x nzatrkatikrmu leplz, kxmule-esz' kztémung kxnzrlxngiting.

9 Nakrlz-angidramu kx leplz kxdrka'-ngrng tr-naprtrung Heven. Bzkq esabrti-lzbqamu mz nzrpi-krmu kx nimu leplz neng Gct, mzli lcpwz tqmncbeamu mz nqm q lcng tqtrka. Murde Gct sa napxtxpx-ngrde leplz amrlx kcng tzalelr da lcde seng: nzrmwimingr kxtrngiu krnalzdr, nzrmwimikr ncblo ncblo kztede o olvz olvz kztede, nzangiongr kxtrngiu Gct angidr, 10 nznpangr da, nztrkibrngr, nzrmnq-zlwzng, nzrpibqtingr leplz, nzesabrtingr leplz, x kzdu-kzng da kxnzmulr lcng. Leplz kxnzmulr lcng, trtxpnzng nzmnc-krdr badr Gct Heven. ☆ 11 Mzli kc ena kzdung nimu kxnzmulr lcng. A' mzli ka trtakitrpedeu nzale-krmu da lcng. Murde Gct ipqpele nimu mz nzkatx-krde alwx ngrmung. X kqlepele nimu mz nzngini-krmu leplz nedeng kxnztrng. X atubqtipele nimu mz nzobq-krde mz nzaxvctr-krbzmu mz Kxetu rgu Jiszsz Kxnzmcpx mz zmatq ngr Mqngrkxtr.

### *Nrkrdrtqmu Sc Gct*

12 Mwx kzdq nimu narpile kx, “Nzrlr-ngrm bange nzale-krnge da kx suti drtwrnge, murde trmnclzpepou mz zmatq ngr Lou sc Mosis.” A'

---

☆ 6:7 Rom 12:17; 1 Tesalonika 5:19; 1 Pita 2:19-21 ☆ 6:10 Nzrlaszng 20:3-4, 14-17; Livae 18:6-23; 19:4, 11, 13, 16; 20:10-21; Lou Kcpwz 4:15-31; 5:7-8, 18-21; Nzyrplapxng 10:1; Asaea 57:17; Jeremaea 6:13-15; Matiu 15:19; Mak 7:20-22; Luk 12:15; Rom 1:26-32; 13:13; 2 Korint 12:20-21; Galesia 5:19-21; Efiszsz 4:3; 5:18; Kolosia 3:8; 1 Timoti 5:14; Taetus 3:2; Jemes 4:11; 1 Pita 2:1; 4:3

rpibo bamu kx, “Eu, a' kzdung da trnzoka-trlru ninge nzmnc-aepztr-krbo mz Gct. Murde kxmule-esz' trmnclzpewxu mz lou mz nzaxvctr-krbo mz Jiszs, a' yrlqpx-lzbqnge mz doa x da amrlx kx nzkrllzr nzamnclz-krbzlr ninge badr.”<sup>13</sup> Mwx kzdq nimu narpile kx, “Mzli kc nelznge tqbrtale-ngrde, mrlz nzaputrngr nide dakxnzng.” Murde mz drtwrmu mrlz nzvz-nqblq-zvz-krmu nike suti drtwr nrkrdrtgmu. Kxmule-esz' da zpwxtx kx sa nabzku nzmu trnamukuu, a' Gct sa natekqtrle nigu x nrkrdrtggu kalr Heven. X mzli lc trpengr nzsutikr drtwrgu dakxnzng. A' vz-rbramu mz nzrpi-krmu kx mrlz nzale-krmu da amrlx kx suti drtwr nrkrdrtgmu. Murde Gct wz-ngrde nrkrdrtggu mz nzwztr-krbzku mz Kxetu rgu Jiszs. A' nrkrdrtggu trngiu dalr nzalengr alwx mz nzrmwimi-krgru kxtrngiu krnalzgu. Nrkrdrtggu sc Kxetu, murde bz-ngrde nzarlax-krde nigu.<sup>14</sup> X Gct, mz zmatq kcpwz tqatulz-ngrmle nrkrdrtg Kxetu rgu mz nzbz-krde, sa natulz-kzple nigu mz nzbz-krgru kalr.<sup>15</sup> Nadcpwz mz drtwrmu kx nrkrdrtgmu nzaxvctrpzng mz nrkrdrtg Kraes. ?Myx kxmule, mz nzngini-krgru nrkrdrtg Kraes, tqrpi-ngrnamu kx takitrde nzbatr-krbzmu mz kzdq nimu nzaxvctr-kzpz mz nrkrdrtg srlx? Bzkqtx pnz!<sup>16</sup> Murde mzli kc ncblo tqmwimi-ngrde srlx nznginipedr leplz kxesz'. Murde Nzryrngrkxtr alvztr-ngrde kx mzli kx leplz kxnzling nzmwimi-lzbq-ngrdr, “*Doa lng li nznginipedr nrkrdrtg x leplz kxesz'.*”<sup>17</sup> A' mz nzaxvctr-lzbqpe-krbzme mz Kxetu Jiszs Kraes,

---

✧ 6:16 Nou 2:24; Matiu 19:5; Mak 10:8; Efisz 5:31

prtrpeq mz Mqnggr Kraes.

<sup>18</sup> Mz nzmukrde lcde, yrlqpx-lzbq mz nzrmwimingr kxtrngiu krnalzm. Murde alwx lc nzatrkatikrde nrkrdrdq myaszpx-zlwzle alwx amrlx. Mzli kc tqrmwimi-ngrn kxtrngiu krnalzm, atrkatiq nrkrdrdqm esz'-krm. X mou atrkati-kzq nzesz'ti-krmu mz Jiszs. <sup>19</sup> ?Myx kxmule, trkrlzwamuu kx nrkrdrdqmu ngi Mrkc Tqtr nyz Mqnggrkxtr mz nzmncpx-krmle elr? Mqnggrkxtr lc tqkabz Gct bamu. X nrkrdrdqmu scdeng. <sup>20</sup> Murde Gct xpepxpele nimu mz narnabr kxlqlwx mz nzbzo-krm Mrlxde mz kros, murde nanginimu leplz angidr nedeng. Mz nzmukrde lcde, rlr-ngrbzmu nrkrdrdqmu nangi dalr nzamatqnggr Gct.

## 7

### *Nzalvztrngr Mz Nzyrlzngr*

<sup>1</sup> Mzli ka sutipe drtwrnge nzayzlu-krbo natq kcng tqveatimamu mz letz scmu. Mz letz lc, rpianu kx mz drtwrmu Gct abrtzlvzle ncblo kx trmwimileu olvz rde. Mz drtwrnge mrlz trnzyrlz-kru ncblo x tr-rmwimiu olvz. A' Gct trabrtzlvzleu da lcng nzmyaszpx-krde kzdung kz da. <sup>2</sup> Mz drtwrnge, kxmule-esz' kzdung da kxmrlz nzvzpxmqng mz trnzyrlz-ngru, a' doa kcng tzsuti zlwz drtwrdr nzrmwimingr leplz, mrlz nzyrlz-krdr. Murde leplz kxnzkqlung nztaong mz alwx ngr nzrmwimingr kxtrngiu krnalzdr. <sup>3</sup> X mz nzyrlzngr, ncblo narlr-lzbq-ngrbz mz olvz rde. X wai-kzle olvz narlr-lzbq-kz-ngrbz mz ncblo ngrde, mz nzmwimi-krde krnalzde mz

nzyrlzng. X bzkq nzp-xngrdr nzmwimingr, murde ma kzdq nidr tqtao mz alwx. <sup>4</sup> Murde nrkrdrdq olvz trscpleu esz'-krde, a' sc kz ncblo ngrde. X wai-kzle nrkrdrdq ncblo trscpleu esz'-krde, a' sc kz olvz rde, mz nznigini-krdr nrkrdrdq x leplz kxes'z'. <sup>5</sup> Mz nzmukrde lcde, bzkq px-ngrn nzrlr-krbzme nrkrdrdqm mz kztem, a' ngi txpwz mz mzli kxpipz mz nzkrka'-krmu mz kzdq da, mz nzesz'tikr drtwrmu. X mz nibrde namwixbl-mouamu, murde ma Setzn tqatalzle kzdq nimu mz nzmwimi-krde doa kx trngiu kernalzde, murde rblxbz bade nzxplrlvz-krde nrkrdrdqde. <sup>6</sup> Naopx angidr kx nzrlr-ngrbz bamu trnzmwixbl-krmu mzli kxpipz. A' bzkq rpamu kx ngi natq kx kapxbo kx navz-nqblq zvz leplz.

<sup>7</sup> Mz drtwrnge, mrlz leplz amrlx trnzyrlz-krdr x trnzmwimiung leplz kz, da kc tqwaix. A' Gct kabzle zmatq ngr nzmnc-kamelrgr mz kzdung leplz, x ka-kzpzle nzyrlzng mz kzdu-kzng leplz.

<sup>8</sup> Rlxti-kzpa'mu bange nike na-ale leplz kcng tzabzopeng. X mz drtwrnge, mrlz trnzyrlz-krdr, da kc tqwaix mz trnzyrlz-krngeu. <sup>9</sup> A' leplz kcng tqrbxlbz badr nzxplrlvz-krdr nrkrdrdqdr, mrlz nzyrlz-mou-krdr. Murde ma nzpqr nzkcmnz-krdr mz nzmwimingr leplz tqataole nidr mz alwx.

<sup>10</sup> Kxetu Jiszs kapxle natq kx, "Bzkq axtzlbqamu!" X aprcbo natq lc bamu, nimu kxnzrlxngiting kcng tzyrlzpeng. <sup>11</sup> A' leplz kcng tzaxtxdr kernalzdr, bzkqpe nzyrlzng, a' nzm kx tzyrlz-moulr, nangi txpwz kernalzdr kcng kai.

☆ 12-13 X natq kx kapxbo bamu, nimu kxnzr-lxngiting kcnq tzyrlztilr doa kxtr-rlxngitiu, nide sele. Nzmu kernalzm kx tqsuti zvz drtwrde nzyrlz-krmu ncdi, bzkq axtxbzme nide. Kxetu rgu trpileu da lc, a' pibo bamu. <sup>14</sup> Nzyrlzngr kxmule lc, trngiu da kxtrka mz nzobqkr Gct. A' Gct amrlzle nzyrlzngr lc murde kzdq nidr rlxngiti. X amrlz-kzle doa nedrng. A' doa ngr nzyrlzkr kxtrnzrlxngitiung, trnzprtrpwzung mz nzamrlzkr Gct. <sup>15</sup> A' nzmu kernalzm kxtr-rlxngitiu na-axtxde nim, rlr-ngrbz nzvz-krde. Nzmu navzle, trngiu alwx ngr kxrlxngiti mz nzobqkr Gct. Murde suti drtwr Gct kx nrw naycpxm mz nabz kxnzrlxngiting. <sup>16</sup> A' nzmu kernalzm kxtr-rlxngitiu trnavzleu, mrlz nzmnc-lxblr-krmu. Murde mw elx kernalzm lc sa nalxngiti-kzle Jiszs mz nzmnc-lxblr-krmu.

<sup>17</sup> Alvztr-zvz-ngrne kzdq nqm q mz dzbe lr-makxtr mrkcng tqvzkixng. Na-abrtzlvzq nzmnc-krm mz nzmncngr kcpwz tqmnc-ngrn mzli kc tqrlxngiti-ate-ngrn. Murde krlc nzmncngr kx yrlqbz Gct bam. <sup>18</sup> Nzmu kx tzpakrpem mzli kc tqrlxngiti-ate-ngrn, bzkq katxq rkx ngr nzr-pakrngr. X nzmu kx trnzpakrkap mzli kc tqrlxngiti-ate-ngrn, bzkq twzq rkx lc. <sup>19</sup> Murde trngiu nzrpakrngr x trnzpakr-ngru kx myapxbz mz drtwr Gct, a' da kx myapxbz nzvz-nqblq-krm natqde. <sup>20</sup> Nimu amrlx namncamu mz nzmncngr kcpwz tqmnc-ngrnamu mzli kc tqrlxngiti-ate-ngrnamu. <sup>21</sup> X mou, nzmu kx tqnginim kxnzawz-nrbalq mzli kc tqrlxngiti-ate-ngrn, bzkq kxne

---

☆ **7:11** Lou Kcpwz 24:1-4; Jeremaea 3:1; Malakai 2:16; Matiu 5:31-32; 19:8-9; Mak 10:2-12; Luk 16:18



drtqm. Murde krlzq nzwztr-krbzme mz Kraes kxmule-esz' nim kxnzawz-nrbalq. A' nzmu kxetu rm kx tqaopxbzle drtqm, murde trmnczpep-wzmeu bade, e mrlz nzvzpe-krm. <sup>22</sup> Murde krlzq nzwztr-krbzme mz Kxetu rgu kxmule-esz' drtqm opx o trtingr. Murde kxnzawz-nrbalq kxrlxngiti trmnczpepwzu mz zmatq ngr alwx. X kxtrnzawz-nrbalqu kxrlxngiti amncz-lzbqzbz mz zmatq ngr Kraes. <sup>23</sup> Murde Gct xpepxle nimu mz narnabr kxlqlwx mz nzbzo-krm Mrlxde mz kros. X mzli ka nipemu leplz nedeng. Bzqk rlr-ngrbzmu mz leplz nzpi-krbzlr bamu kx namncz-mopwzmu mz zmatq ngrdr mz nzngini-krmu kxnzawz-nrbalq nedrng. <sup>24</sup> Mzlengeng x inwengeng, namncamu mz nzmncngr kcpwz tqmnc-ngrnamu mzli kc tqrlxngiti-ate-ngrnamu, mz nzmnc-xgle-krmu nzokatrkr Gct.

<sup>25</sup> Veati-kzpa'mu bange nzymnetr-krnge mz doa kcng trnzylzkang. Trpnzng natq kx kam Kxetu rgu kx naycmnetngr mz da lc. A' sa napipxbo nzao-krnge drtwrnge, murde mz nzryckr drtwr Kxetu, batrple bange nzngini-krnge ncblo kx takitrde nzbrtikr drtwr leplz le. <sup>26</sup> Mz drtwrnge, mrlz trnzylz-kru leplz lcng, murde mzli ka mzli r nzatrkatizlwngr kxnzrlxngiting. <sup>27</sup> Nzmu kx tqyrlzpeq, bzqk ax-txbzme krnalzm. A' nzm kx tryrlzwwq, trmrlzu nzrtangrti-krm kx nayrlztiq. <sup>28</sup> A' nzm nayrlzq, trngiu alwx. X nzm olvi kxmnc-kamelr nayrlzle, trngi-kzu alwx. A' mz mzli r nzatrkatigr lc kxnzrlxngiting, leplz kcng tzyrlzng nzxpu-krdr sa naetunepx mz nzaotikr drtwrdr nzatrkatigr krnalzdrng. X suti drtwrnge kx da lcng bzqk

nzprtbzng bamu.

<sup>29</sup> Mzlengeng x inwengeng, nadcp<sup>x</sup> mz drtwrmu kx mzli nyzgu mz nrlc ka mz nzwztr-krbzku mz Kxetu rgu mrbcnepwz. Nimu kcng tzyrlzng nzwztr-krbzmu mz Kxetu namyaszpxle nzwztr-krbzmu mz krnalzmung.\*

<sup>30</sup> Bzkq nqm<sup>q</sup> ngr nzmnc-krmu batrpzle trnzwztr-krpwmuu mz Kxetu. Kxmule-esz' drtwrmu vz zlwz o abrtz-zlwzamu o xpeamu da kxmrlz, a' navz zvz nzwztr-krbzmu bade.

<sup>31</sup> Kxmule-esz' mncamu mz nrlc ka, a' bzkq kxne drtqmu dalr nrlc ka. Murde nzlu-krmu x dztumung sa namrbr-aning.

<sup>32</sup> Trsutiu drtwrge nzxkr mz drtqmu dalr nrlc ka, myapxbz nimu kxnzyrlzng. Murde ncblo kxtryrlzu krlzle nzwztr-krbzle mz Kxetu mz nabzde atwrnrngr x nzaotikr drtwrde kxnamu nzabrtzlvzkr Gct nide. <sup>33</sup> A' ncblo kxyrlz yc zlwz mz drtwrde dalr nrlc ka. X suti kz drtwrde olvz rde nzabrtzlvz-krde nide. <sup>34</sup> Delc, naotingr drtwrde Kxetu rde x olvz rde nzabrtzlvz-krdr nide. Da kc tqwai-kzle mz olvz. Murde olvi kxtryrlzu krlzle nzwztr-krbzle mz Kxetu mz nzlrpx-lzbq-krbzle bade mz nrkrdrdqde x mz nabzde atwrnrngr. A' olvz kxyrlz yc mz drtwrde dalr nrlc ka. X suti kz drtwrde ncblo ngrde nzabrtzlvz-krde nide. <sup>35</sup> Krlc tqpi-ngrbole, mwx naokatrpo nimu, murde nakrlz-angidramu nike na-aleamu. Trkapxpou natq kx xplr kx bzkq yrlzamu. A' rngidrlvz-ngrbo bamu nzmcti-krmu da kx namrlzbz bamu mz nzmnc-krmu,

---

\* **7:29** A' bzkq yrlqpx-lzbqamu mz nzmrlzti-krmu x nza-clve-krmu krnalzmung x doa nemung.

murde bzkq da kx atrkatile nzwztr-krbzmu mz Kxetu.

<sup>36</sup> Rlxti-kzpa'mu bange nzymnetr-krnge mz trte kx tr-rlr-ngrpwzleu mz inyxde kxmnc-kamelr nzyrlz-krde. Nzmu ncblo lc narpile mzli ka kx vz-rbr mz nzrpwa'-krbzle mz inyxde nzyrlz-krde mzli kc, e mrlz nzrlr-krbzlele bade. Myapxbz mzli lc tqyc-ngrbepz mzli r nzngine-krde. Krlc trngiu alwx. <sup>37</sup> A' nzm drtwr ncblo lc natu-amqngile kx mrlz inyxde trnzyrlz-krdeu, x trpnz-moungr da kx aelwapx-ngrde kx olvi lc nayrlz, e ncblo lc trvz-rbru mz nzvz-nqblq-krde me pnz drtwrde. <sup>38</sup> Mrlz nzyrlz-krde o trnzyrlz-krdeu. A' mz drtwrnge, mrlz olvi lc trnzyrlz-krdeu, murde mzli ka mzli r nzatrkatizlwzngr kxnzrlxngiting. †

<sup>39</sup> Mz nzyrlz-moungr, napi-mopwo bamu kx doa kxyrlz mnctr-alobz mz krnalzde, nakrlz bzle nzbzkr kzdq nidr. A' nzbzkr kzdq nidr ayrkrpxle nzyrlz-krdr. X nzrlr-ngrbz mz krkc tqlu nzyrlz-mou-krde, a' ngi txpwz mz doa kxrlxngiti. <sup>40</sup> A'

---

† **7:38** Mz natq lr Grik ngalrde lcnq 36-38 mwx drtwr ngrdr li. Kzdq drtwr ngrde nzyrope. X kzdq kz drtwr ngrde nide sele: *36 Rlxti-kzpa'mu bange nzymnetr-krnge mz ncblo kx nzipelr mz kzdq olvi nzyrlz-krdr; a' tekqtr-moule drtwrde murde mz drtwrde abrtzlvz zlwz Gct trnzyrlz-ngru. A' mzli ka tekqtr-moule drtwrde, murde mz drtwrde trtubqpzu mz olvi lc x mou rblxbz bade nzxplrlvz-krde nrkrdrdqde. Mrlz nzvz-nqblq-krde me pnz drtwrde. Nzyrlz-krdr trngiu alwx. 37 A' nzm drtwr ncblo lc natu-amqngile kx mrlz trnzyrlz-krdeu, x trpnz-moungr da kx aelwapx-ngrde kx takitrde nzyrlz-krde, e ncblo lc trvz-rbru mz nzvz-nqblq-krde me pnz drtwrde. 38 Mrlz nzyrlz-krde o trnzyrlz-krdeu. A' mz drtwrnge, mrlz trnzyrlz-krdr, murde mzli ka mzli r nzatrkatizlwzngr kxnzrlxngiting.*

mz drtwrnge, sa na-abrtz-zlwz-ngrde trnzyrlz-krdeu, mz mzli r nzatrkatizlwzng r lc kxnzrlxngiting. X lxngitix kx drtwr lc vzpxm mz Mqngrkxtr.

## 8

### *Nzmukr Kxnzrlxngiting Dakxnzng Kx Nzkabz Mz Mqngr Drka' Kxnzlx*

<sup>1</sup> Rlxiti-kzpa'mu bange kx nzm takitrde kxnzrlxngiting nzm-krdr dakxnzng kx ngi blz nzkabz mz mqngr drka' kxnzlx. Rpiamu kx Mqngrkxtr kamle bagu nzkrlzng amrlx kx takitrde nzngq-krule. A' nzkrlz-krmu lc krlzle nzbatr-krbzle nzglqpx-lzbq-krmu, nzm trnamrlzti-kzwamuu kztemung kxnzrlxngiting. Murde nivz lc dekc tqaxplrle nzrlxngitix lrmakxtr x nzes'tix drtwrdr. <sup>2</sup> Leplz kcng tzipilr kx nzkrlz-angidrlr da amrlx, trnzkrzlru da kx myapxbz mz nzkrlzng. <sup>3</sup> A' mz krkcng tzmrlztilr Gct, sc tqrpilr kx nidr doa nedeng. X leplz lcng tzmrlzti-kzlr kztedrng x nzkrlz-krdr tubq.

<sup>4</sup> X mrlz nzaotix drtwrmu nzalvztrng r lc mz nzmung dakxnzng kxnzkabz mz mqngr drka' kxnzlx. Murde krlzku kx trpnz-moung gct, a' ngi txpwz Gct angidr kc esz'txu. <sup>5</sup> Leplz nzangioldr mqngr x drka' kxnzklung kxmule-esz' kxnzmncng mzlilxlr o mrka mz nrlic, mz nzkrlz-krdr kx nidr gct rdng x kxnzetu rdng. <sup>6</sup> A' krlzku kx Gct esz'txu, Trtegu kc tqwztrpzku bade x nou leplz x da amrlx. X Kxetu esz'txu, Jisz Kxnzmcp, kc tqwz-ngarde leplz x da amrlx x tqkamle bagu nzlung r mz nzaxvctr-krbzku bade.

<sup>7</sup> A' kxnrlngriting amrlx trnzkrzlru nza-lvztrngr angidr lcng. Murde mzli kc kzdung nidr nzangioldr mqngr drka' lcng tzlz. X mz drtwrdr nzaleng alwx mzli ka mz nzmukrdr dakxnzng kx ngi blz kx nzkabz mz mqngr drka' kxnzlx. X myapengr drtqdr nzvz-rbr-krdr lc. <sup>8</sup> Nakrlzku kx nzmungr o trnzmu-ngru trtektqrleu nzmnc-zpwx-krgr badr Gct.

<sup>9</sup> A' mz nivz, aclvetio-lzbqamu, murde nzale-krmu da kxtubqbz mz drtwrmu ma tqataole mz alwx kztemung kx nzrlxngiti-krdr ngrgobe. <sup>10</sup> Bzkq kztem lc mcpzle nzmukrm da mz madrka', murde ma tqngi-batrpzle bade nzale-krde da kx rpi drtwrde ngi alwx. <sup>11</sup> Zbz sc tqatrkatipeq nzrlxngitigr mzlem lc tqrlapx mz nzbzkr Kraes, murde aleq da kxtubqbz mz drtwrm. <sup>12</sup> Alwx nrgm, mz nzatrkati-krm nzlrxngitigr kztem kc tqalele da kx rpi drtwrde ngi alwx, ngi kz alwx ngr nzatrkati-krm Kraes. <sup>13</sup> Mz nzmukrde lcde, trpengr nzmukrnge dakxnzng kznike na-ataole kztenge mz alwx, murde ma tqatrkati x nzrlxngiti-krde.

## 9

*Aposol Pol Nzaotigr Drtwrde Le Kztedeng*

*Nzmyaszpxlr Nide* \*

<sup>1</sup> Takitrde nztwz-krnge x nzale-krnge da kxkqlu, a' mzli kang kqlu axtx-ngrboleng mz nzokatr-krnge kztengeng. Kxmule-esz' kzdung nimu nzpx-ngrdr nzmncz-krmlr mz zmatq rnge, a' ni-kznge aposol, mz nzmc-krnge Kxetu rgu Jiszs, kc tqadcpx-lzbqm bange. X nznngini-krmu kxnzrlxngiting vzpxm mz nzvz-nqblq-krnge nzwzng r kc tqaprcmle bange. <sup>2</sup> Kxmule esz' kzdu-kzng leplz nzpctxpx-ngrdr nznngini-krnge aposol, a' nimu kx nzrkrlnzng kx ninge aposol kc tqmnczlbzmu mz zmatq ngrde, murde abtrtpzmu drtwrmu mz Jiszs mzli kc tqyapwx-tipxbo Nrpakxmrlz bamu.

<sup>3</sup> Mzli lc tqmnc-ngrbo bamu, tr-rlr-ngrpou bamu nzaclve-krmu ninge mz nzrka-krmamu da bange. Dekc kzdung nimu tZRPI-ngrdr kx trnginingeu aposol angidr. <sup>4</sup> Dazpwxtx kx takitrde leplz kcng tzlaltqzbzng mz aposol nzrka-krbzlr bade dakxnzng. <sup>5</sup> Pita badr kzdu-kzng aposol, x mzleng Kxetu Jiszs nzvzminedr olvz rdrng mz nzayo-krdr mz nzwz-krdr x leplz nzaclvelr nidr amrlx. X takitrde kz nzaclve-krmu nigr badr olvz ngrdr kztengeng kcng tqvzminekr mz nzwz-krgr. <sup>6</sup> Bzkq rpi drtwrmu kx mrlz nigr ncdR Banabas nzwz-krgr mz nzrtwz-krgr trau,

---

\* **9:** Pol naycmnetr-mou-ngrde nzmungr dakxnzng kx nzkabz mz mqngr drka' kxnzlx kc tqpi-kaile mz dckrlzde kc 8. A' mz dckrlzde kc 9, rpile kx navz-nqblqlr lrpzki rde mz nzaotikr drtwrde kx kztedeng nzmyaszpxlr nide. X kxmule-esz' kzdung nidr nzrpilr kx trnginideu aposol angidr, a' aelwapx-kz-ngrbzle badr kx nide aposol angidr. Zbz mz dckrlzde kc 10 ycmnetr-mou-ngrde mz dakxnzng kx nzkabz mz mqngr drka' kxnzlx.

mzli lcpwz tqaclve-ngrnamu kxnzetu kc-kzng. <sup>7</sup> Murde opx angidr kx takitrde nzxpengr ncblo mz nzwz-krde. Ncblo ngr vea nzxpeng mz nzwz-krdr mz ami. X ncblo kx wz mz nrlanc ngq-kzle kzdung dalr nrlanc. X ncblo kxacive sip, mnq-kzle lue lr neyr sip nedeng.

<sup>8</sup> X mz natqnge lcng trvz-nqblqtxpou drtwr ncblo mz nrlc ka, a' Loukxtr pi-kzle da lc, <sup>9</sup> mz nzrpi-krde kx, *"Bzkq pebzmu nao kzu, a' rlr-ngrbz bade nzmukrde mzli kc tqrnzltipx-ngrde nra wit."* ☆ ?Myx kxmule, rpianu kx Gct ycmnetr-ngrpwzle kzu? Trtingr! <sup>10</sup> Murde krlc tqycmnetr-kz-ngrde nigu. Doa kc tqpe rtq x doa kc tqrkq nrade mz nzbrpe-krde, mz drtwrdr natwz-kzlr kzdung dakxnzng ngrde. Da kc tqwai-kzle mz nigr, mz leplz kcng tqaclvekr. <sup>11</sup> Takitrde nzrkakrmamu bagr kzdung da kxpipz kx naokatrle nrkrdrdqgr mz nrlc ka, murde rlrpx-lzbq-ngrgr kx naprtr-kzamu mz da kxmrlzting kx nayc-alo mz nrlc kc navzm. <sup>12</sup> Mrlz nzokatr-krmu leplz kc-kzng tzalvztrlr nimu. A' mz nzngini-krnge aposol ngrmu, zmatq rnge namyaszpxle zmatq ngrdr. X takitrde nigr badr kztengeng mz nzwzkr Kxetu nzrkakrmamu da bagr.

A' aoti drtwrgr kx bzkq wzkr mz zmatq lc mz nzrlx-krbzkr da bamu, kxmule-esz' da amrlx rblxm bagr, murde ma tqrpwa'-ngrne Nrpa ngr Kraes, mz nzrpikr leplz kx alvztr-ngrne nimu nztwz-nrbalq-krnge dakxnzng. <sup>13</sup> X takitrde nzokatr-krmu nigr mz dakxnzng mz nzvz-nqblq-krmu pris kxnzwzpxmqng mz Mangrnzangiongr Yawe. Murde nzrtwzng dakxnzng

---

☆ 9:9 Lou Kcpwz 25:4

kx nzrlr-ngrbz mz Mangr-nzangiongr x ncblo kxznkabzlr animol kx ngi blz mz olta, nzrtwz-kzng kzdung drte mz blz lc. <sup>14</sup> X Kxetu Jiszs esz'-krde kapx-kzle natq kx leplz kcng tzxlrlr Nrpakxmrlz takitrde nzrka-krbzlr dakxnzng mz leplz kcng tzyapwxtipxbzlr nrpa lc badr. ✧

<sup>15</sup> Mz nzmu-krde lcde, kxmule-esz' takitrde nzrka-krmamu dakxnzng bange mz nznngini-krnge aposol, a' trtwzwxu dakxnzng lcng. A' tryr-ngrpou da lcng murde natwzx du da kx nangi scng mz nzaclvle-krmu ninge. Glqpx-lzbq-ngrne trnzrtwz-krngeu da scdr leplz mz nzyapwxtipx-krbo Nrpakxmrlz badr. X mrlzvxitx nzbztr-krnge mz kzdq da, ma tZRpi leplz kx pokia-ngrne nzglqpx-lzbq-krnge lc. <sup>16</sup> Murde nzglqpx-lzbq-krnge lc trvzpxpuu mz nzyapwxtipx-krnge Nrpakxmrlz, a' murde Gct kapxle natq mz nzyapwxtipx-krngele. X trmrlzpuu bange nzmu trnavz-nqblqwxu le. <sup>17</sup> Nzmu natwzx nzwzngr lc esz'-krnge, takitrde nzxpengr ninge. A' apux kxznzawz-nrbalq ne Gct kc tqaprcmle nzwzngr lc bange. X kxznzawz-nrbalq trnzxpeu mz nzale-krde nzwz-krde. <sup>18</sup> Ninge kxznzawz-nrbalq ne Gct x tr-rtwzwxu da mz nzale-krnge nzwzngr kc tqaprcm Gct bange. X mz mzli lcpwz ni-kzngc aposol ngrmu x takitrde nzrtwz-krnge da murde okatrx nimu. Kxmule-esz', a' rpwa'-ngrbo bamu nzrka-krmamu da bange, murde suti drtwrncg kx Gct na-abrtzlvzle ninge.

<sup>19</sup> Mz nzmu-krde lcde, trpnzngr doa kx mn-clzbo mz zmatq ngrde. A' avzo-lzbqmx mz nzwztr-

---

✧ **9:14** Matiu 10:10; Luk 10:7; Galesia 6:6; 1 Timoti 5:18



krbo mz leplz amrlx, murde navectrpwc' leplz mz Kraes. <sup>20</sup> Mz nzwz-krgr badr lr Jiu, kxmule-esz' trmnclzpepou mz Lou sc Mosis, a' vz-nqblqx nqm̄q krgrng, murde navectrpwc' mzlengeng lcng mz Kraes. <sup>21</sup> X mz nzwz-krgr badr nimu kcng trngiulrJiu kxtrnzkrzlru Lou sc Mosis, vz-nqblqx nqm̄q krmung. X trvz-nqblqwxu nqm̄q krgrng mz dakxnzng x mz nzwztingr da. A' vz-nqblq-zvzx da kxtubq mz drtwr Gct, murde mnclzbo mz Kraes. <sup>22</sup> Mz nzmnc-krgr badr leplz kcng nzrlxngiti-krdr ngrgo, apu-kzx doa kx nzrlxngiti-krde ngrgo, murde ma tqatrkatiX nzrlxngiti-krdr, a' na-axplrx nidr. Mz nzmukrde lcde, mnc-nqblqx nqm̄q krdr leplz kang kqlu, murde navectrpwc' kzdung nidr mz Kraes. <sup>23</sup> Sa na-ale-zvzx da amrlx mz nzlepx-krnge Nrpakxmrlz mz leplz kxnzkqlung. Murde suti drtwrnge nzprtr-kz-krpo badr mz da kxmrlzting kcng tqkabz Gct mz krkcng tzrlxngiting.

<sup>24</sup> Mz nzmnc-krgr mz nrlc ka apuku leplz kcng tzvong mz nzesangr. A' leplz kcng tzaovxiong txpwz kx nztwzlr dakxmrlz mz nzayrkrpx-krdr nzesangr lc. Mz nzmukrde lcde, da amrlx kx aleamu mz nzmnc-krmu naokatrle nimu mz nzayrkrpx-krmu nzesangr lc, murde natwz-kzamu nzlungr kxboi. <sup>25</sup> Leplz kznikeng nasuti drtwrdr nzvz-krdr mz sport mz Olimpik, navz vz nzaycnglrli-krdr nrkrdrtdr mz nazplrkrdrng. Murde natwzlr kraon ngr leu kx ani txpwz nzblo-krde, x mzli r nzrglqpxngr nidr trboiu. A' mz nzvo-krgr mz nzesangr lc, abzlwzku nztwz-krgr da kxmrlz kx nayc-alo mz nzprtr-krgr me matq ngr Gct Heven. <sup>26</sup> Krlc

nqmq krnge mz nzmnc-krnge. Murde natwz-kzx da kxmrlz kx nakabz Gct mz leplz kcng tzaovxiong. Apux ncblo kx vo mz nzesangr, mz nzvo-ani-krnge x nzaotikr drtwrnge mrkc tqe-sakingr nzesangr lc. X apu-kzx ncblo kx eta mz sport. A' tr-eta-abeanewxu. <sup>27</sup> Apusr-ngrne nrkr-drtqngge kxnzawz-nrbalq nenge, mz nzlolvzo-krngele x mz nzrtulrtr-krbo nzvz-nqblq-krde me pnz drtwrnge. Murde ma tqrngidrlvz-ngrbo mz leplz nzlolvzo-krdr nidr esz'-krdr, a' pxtpx-ngrde ninge Gct kalr mz trnzvz-nqblq-krngeu natqngeng.

## 10

### *Kxnmung Mz Madrka' Nzangioldr Kxtrngiu Gct Angidr*

<sup>1</sup> Nadcpz zvz mz drtwrmu nzpxtpxkr Gct leplz nedeng mzli kc bqnc. Murde mzli kc lr Israel tzrlasz-ngrdr Ijipt nzmnczbzng mz nza-clvekr Gct nidr. X yrlqle dcbz kx apule nctrpou kxwzpx nangi rkx ngr nzmnc-krbzle badr. X arlapxle nidr mz ami ngr lr Ijipt, mz nzakipx-krde Prla Bla, mz nzkawi-krdrle mz nanycdr. ✧ <sup>2</sup> Mz nqmq lcpwz tqarlapxngr Jisz nigu x axvctrpzkz bade mz nzwrkxtrngr, lr Israel nzaxvctr-kzpzng mz Mosis kc tqmailzle nidr mz nzrlapxngr. Nzkawi-krdr Prla Bla x nzmncz-krbzlr mz dcbz ngi kzdq namrlzu r nzwrkxtrngr. <sup>3-4</sup> X mz nqmq lcpwz tqmu-ngrgu x tqrmnq-ngrgu da kx vzpxm mz zmatq ngr Gct mz Nzmungrkxtr mzli ka, leplz lcng mzli kc nzmung

✧ **10:1** Nzrlaszng 13:17—14:31

dakxnzng x nzrmnqng lue kc tqkabz Gct badr mz zmatq ngrde. Rplz kxetu kc tqyrlep-x-ngrm lue ngi rkx ngr nzmnc-krbz Kraes badr mz nzokatr-krde nidr; da kc tqwai-kzple bagu mzli ka. ✧

<sup>5</sup> A' nadcp-x mz drtwrmu kx kxmule-esz' Gct arlapxpele nidr x amrlzle nidr x okatr-zvzle nidr; a' ngyati zlwz drtwrde krkcng tzangioldr kxtrngiu Gct angidr. X odatile nidr mrkc lzke. ✧

<sup>6</sup> Da lcng nzyrong mz nzrngidrlvz-krmlleleng bagu, murde bzkq prtrpzku badr mz nzayr-plapxng-r kcpwz. Bzkq sutitx zlwz drtwrgu da kxdrka'ngr da kc tzwai; murde ma tzayrplapx-alongr nigu. <sup>7</sup> Nzryrngrkxtr rpile kx, "*Leplz lcng tzangioldr mqngr nei kzu kxnlz mz nzm-krbzlr bade x nzalvzlr nide.*" ✧ Bzkq mutrpzku mz mqngr drka' kxnlz da kc tzwai kzdung nidr; murde ma tqangio-kzku kxtrngiu Gct angidr. <sup>8</sup> X bzkq rmwimiku kxtrngiu krnalzgu, da kc tzwai kzdung nidr. Murde mzli lc leplz siu-nzpnul-nrade-tq (23,000) nzbz-krdr kxesz'. ✧ <sup>9</sup> X bzkq matitr drtwrgu zmrlz ngr Kxetu rgu mz nzmcti-krku kx na-ayrplapxle nigu o trtingr; da kc tzwai kzdung nidr. Murde ma tqodati-kzle nigu da kc tqwaile mz lr Israel kcng tzbzting mz nzmakxkr ningidoe nidr. ✧ <sup>10</sup> X bzkq apuamu kzdung nidr kcng drtwrdr tqltrpz mz Mosis, mz nzlctr-krm drtwrmu bange. Murde enjrl kc tqatwzlr-ngrbz Gct nibqtile nidr. ✧

---

✧ **10:3-4** Nzrlaszng-r 16:4-30; 17:1-7; Nzkqlu-krdr 20:2-13; Lou Kcpwz 8:15-16; 32:4, 15, 18, 30-31; Nemaea 9:15, 20; Sam 78:15-31; 105:40-41 ✧ **10:5** Nzrlaszng-r 32; Nzkqlu-krdr 14 ✧ **10:7** Nzrlaszng-r 32:6 ✧ **10:8** Nzkqlu-krdr 25:1-9 ✧ **10:9** Nzkqlu-krdr 21:4-7 ✧ **10:10** Nzkqlu-krdr 16:41-50

<sup>11</sup> Da lcng tqprtztibzng badr nznrgidrlvz-ngrm bagu kx bzkq xpqbrlr-ngrgu Gct. X nzyro-kzng mz nzokatr-krdr nigu kcng tqmncpeku mz mzli r nzangidatipekr Gct drtwr kc tqyrlq-pnzle mz nzarlapxkr Kraes leplz. <sup>12</sup> Mz nzmukrde lcde, doa kx rpile kx tu-amqngipe mz nzrlxngiti-krde x rblxbz bade nztao-krde mz da lcng, naclvetio-lzbq. Trmrlzu nztao-krde mz nzangio-krde kxtrngiu Gct angidr x dekc trnaptrrpe-ngrdeu mz nzlungr kxboi. <sup>13</sup> Nzatalzngr amrlx kcng tzprtzbzng bam, nzprt-zkzpzng mz leplz amrlx. A' mrlz nzabrtr-krbzme drtwrm mz Gct, kc tqokatr-zvzle nim. Murde sa na-aelwapx-ngrbzle bam lrpzki r nzyrbqpx-krm. X mz nzo-zli-krmle, sa natu-amqngiq, x nzatalzngr trpnzngr nzaovxio-krde nim.

<sup>14</sup> Mz nzmukrde lcde, kx mzlengeng x inwengeng, yrlqpx-lzbq-zvzamu mz nzangio-krmu mqngr drka' kxnzlj murde trngiu Gct angidr. <sup>15</sup> X mz nzngini-krmu leplz kxnzyrplapxng, nakrlz-angidramu kx natq kc napibo bamu tubq. <sup>16</sup> Mz Nzmungrkxtr, mzli kc tqrmnqo-ngrgu mz kap ngr waen kc tqawi-ngrbzku mz Gct, x tqmungrgu bret kc tzlopwxix, prtrku mz da kxmrlzting kcng tzvzpxmqng mz nzyrleo-krm mepyr ngr Kraes x nzbzo-krmle mz kros. <sup>17</sup> Bret esz'txu, x nigu amrlx nrkrdrdq esz', murde prtr-ngrgu bret kc esz'. X bret lc esz' ngi rkx ngr nrkrdrdq Jiszs, kc tqodutr-lxbl-ngrbzku bade mz Nzmungrkxtr.

<sup>18</sup> Na-aoti kz drtwrmu lr Israel. Murde mzli kc tzngq-ngrdr dq animol kc tqngi blz, opx angidr kx nzodutr-lxblrbzng mz Gct kcpwz tzkabzlr bade blz kc. <sup>19-20</sup> A' kxtrnzrlxngitiung nzkabzlr

blz krdr mz mqngr drka' kxnlz nedrng, a' trngiu mz Gct angidr. Kxmule-esz' mqngr drka' kxnlz nedr trnzluung x blz krdr maneng, a' trsutiu drtwrnge nzodutr-lxblr-krbzmu mz drka' lcong. <sup>21</sup> Murde Gct tr-rlr-ngrpwzleu nzrmnqo-krmu mz kap sc Kraes, x mz nibrde krsc kz drka'. X tr-rlr-kz-ngrpwzleu nzmu-krmu bret kxtr, x mz nibrde dakxnzng kx nzkabz mz drka'. <sup>22</sup> Bzkq aleamu da kxmule lcong, murde ma Gct tqngyati drtwrde nimu mz nzangio-krmu gct kx trngiu Yawe esz'-krde, x sc tqayrplapx-zlwzpele nimu.

<sup>23</sup> Kzdung nimu nzrpilr kx, “Nzrlr-ngrm bange nzale-krnge da kx suti drtwrnge, murde trmn-clzpepou mz zmatq ngr Lou sc Mosis.” A' napibo bamu kx, “Kzdung da kx aleamu trnzokatrleu kztemung mz nzesz'tikr drtwrmu x mz nzaetunepxngr nzrlxngiti-krdr.” ✧ <sup>24</sup> Bzkq aoti txpwz drtwrmu nimu esz'-krmu, a' na-aoti kz drtwrmu da kx naokatrle kztemung. ✧

<sup>25</sup> Takitrde nzmu-krmu animol kznike rmc-tiamu me nzamwangr da. A' bzkq yc mz drtwrmu nzveati-krbzmu kx nzkabz mz mqngr drka' kxnlz o trtingr. <sup>26</sup> Da kc tqwai nzpikr Nzryrngrkxtr le kx, “*Nrlc atwrnrngr nyz Yawe, x doa amrlx mz nrlc nedeng x da amrlx mz nrlc scdeng.*” ✧ Mz nzmu-krde lcde, Gct rlr-ngrbzle bamu nzmu-krmu dakxnzng amrlx, mz nzawi-krbzmu bade mz da lcong.

<sup>27</sup> Nzmu kzdq ncblo kxtr-rlxngitiu na-aveatimle nim mz nzmu-krmu badr ma nyzde, vzbz ye x ngq da kznikeng katibzle bam. X

---

✧ **10:23** 1 Korint 6:12 ✧ **10:24** Filipae 2:4 ✧ **10:26** Sam 24:1

bzkq yc mz drtwrm nzveati-krbzme dakxnzng kx kabzleng kx nzkabz mz drka' o trtingr. 28-29 A' nzmz kzdq kcng doa rpibzle bam kx, "Dakxnzng lc nzkabz mz drka'," bzkq ngqn dakxnzng lcde, murde ma tqatrkatiq nabz doa kc tqkxmu nzymne-krbzle lc bam. 30 Murde kxmule-esz' tratrkatileu nabzng mzm nzmukrge dakxnzng lc tqawi-ngrbo mzm Gct, a' na-aoti kz drtwrge leplz kcng tzrpilr mzm nabzdr kx vz-rbrx mzm nzngq-krngele. 31 X na-amrlueku Gct mzm da amrlx kx aleku, kxmule-esz' muku o rmnqku. 32 Bzkq atrkatiamu drtwr lr Jiu o kxtrnzrlxngitiung, murde ma tzpxtxpx-ngrdr Nrpakxmrlz. X bzkq atrkati-kzamu drtwr kztemung lrmakxtr kxnzrlxngiting. 33 Da kc tqwai-zvzx mzm nzabz-zlwz-krnge kx leplz amrlx na-abrtzlvzlr ninge mzm da kcng amrlx tqalexng. TralewXu da kx mrlzm bange, a' ale-zvzx da kx naokatrle leplz kxnzkqlung murde narlapxng mzm nzlXngiti-krdr Jiszs.

## 11

<sup>1</sup> Mzm nzmukrde lcde, vz-nqblqamu nqmqq krnge mzm da lc, da kc tqwaix mzm nzvz-nqblq-krnge nqmqq kr Kraes.

### *Nqmqq Krgu Kx Takitrde Olvz Ngr Lrmakxtr*

<sup>2</sup> Rpiamu mzm letz scmu kx dcpX mzm drtwrmu nqmqq krnge x da amrlx kcng tqalvztr-ngrne nimu. X rpi-kzamu kx vz-nqblq-zvzamu nqmqq ngr nzangiongr mzm makxtr kcng tqaprcho bamu. X abrtzlvzx nimu mzm da lcng. <sup>3</sup> A' navz-nqblq-kzamu da kc tqpiho bamu kx bzkq atrkatiamu

drtwr kztemung kxnzrlxngiting. Mzli kc tqyrlwr-lxblr-ngrnamu mz nzangiongr, nar olvz na-akqlvzlr mz nzvz-nqblq-krde nqm q krgu mzli ka, mz nzkrka'-kato-krdr x mz nzrplzpx-krdr nrpa kx kabz Mqngrkxtr badr. Nakrlz-angidramu kx ncblo amrlx kxnzrlxngiting nzmncclzbzng mz Kraes. X olvz nzmncclzbzng mz ncblo, murde olvz kc ayrrngr nzwzng m nrvr ngr blrir Adzm. X Kraes mncclzbz mz Gct. Mz nzmu-krde lcde, mz nzvz-nqblq-krde nqm q krgu mz nzangiongr, ncblo x olvz bletipxng. <sup>4-10</sup> X mz nzangiongr lc, trtakitrdcu ncblo nzakqlvz-krde narde, murde Gct wz-kai-ngrde ncblo mz mqngrde, murde na-amatqlr nide. Dekc ncblo kx akqlvzle narde mz nzangiongr, amanede Kraes kc tqngi nou nzlu-krde. Mz nzwzkr Gct leplz, ncblo x olvz bletipxng. Murde Adzm trvzpxpuu mz Iv, a' Iv vzpxm mz Adzm. X Gct trwz-ngrdeu Adzm mz nzokatr-krde Iv, a' wz-ngrde Iv mz nzokatr-krde Adzm, murde olvz na-amatqlr ncblo. Dekc olvz kx trakqlvzleu narde mz nzangiongr, amatinede ncblo kxnzrlxngiting, mz nzrtulrtr-krde nzrsakrlr-krdr badr ncblo. X nzmyakr drtq olvz kxmule lc, esz' ncd r olvz kx nqngi narde nzyrlxo x olvz kx nqngi narde nzrpakingr apule ncblo. Delc, mrlz olvz nzakqlvz-krdr nardr mz nzangiongr, nangi rkx ngr nzmncclz-krbzlr mz zmatq kxtubq, murde enjrl na-abrtzlvz-kzlr nidr. <sup>11</sup> Kxmule-esz', a' mz nzaxvctrpe-krbzku lc mz Kxetu, olvz nzmnc-xglelr ncblo, x ncblo nzmnc-xgle-kzlr olvz. <sup>12</sup> Kxmule-esz' Iv vzpx-kaip mz Adzm, a' abzo mzli lc ncblo nzvzpxmqng mz olvz. Drtwr ngrde kx leplz amrlx nzrsakrlrng mz

nzmnczlz-krbzlr mz Gct kc tqwz-ngrde nigu.

<sup>13</sup> Mwx elx mzli ka drtwrmu esz'ti mz nzrpi-krnge kx nar olvz na-akqlvzlr mz nzkrka'-kato-krdr x mz nzrplzpx-krdr nrpa kx kabz Mqn-grkxtr badr. <sup>14</sup> X mz drtwrgu, trtakitrdeu ncblo nqngi nardr nzboi-krdr, murde mz nqm qrgu ngi da kx myangr drtqdr. <sup>15</sup> A' rpiku kx mrlz nzboikr nqngi nar olvz, murde lqngipx mz nzobq-krqu. X opxm kx Gct kabzle nqngi nardr nangi dalr nzakqlvz-krde nardr. Delc takitrde nzakqlvz-krdr nardr da kc tqwai nzpipx-krbole bamu. <sup>16</sup> Bzkq kxvecpx-lzbqm mz da lc, murde alvztr-ngrne nqm q lc mzli kc tqmnc-ngrbo bamu, x dzbe lrmakxtr amrlx neng Gct nzvz-nqblq-kzlr.  
\*

### *Da Kx Akipxle Kxnzrlxngiting Mz Nzmungrkxtr*

<sup>17</sup> Trabrtzlvzwxu nimu kxmu nzvz-nqblq-krmu kzdung nqm q ngr makxtr kcng tqaprcbo bamu, myapxbz mz nqm q krmu mz Nz-mungrkxtr kx atrkatile kzdung kztemung. <sup>18</sup> Xlrx

---

\* **11:16** 11:2 Pol ycmnetr-ngrde nqm q krdr mzli lc, a' trngiu natq kx rngidrlvz-ngrmle kx navz-nqblqku mzli ka. 11:3 Mz drtwr Gct x mrkc Heven leplz amrlx nzsakrlrng, murde wz-ngrde nidr amrlx mz mqngrde. 11:4-10 Mzli lc mz nqm q krdr ngi da kx myangr drtq olvz kx nqngi narde kxnmusr-ngrdr lcng. Trkrlzkuu drtwr angidr ngr natq Pol mz nzrpi-krde kx, 'murde enjrl.' A' nzrtekqtr-krgr vz-nqblqle kzdq drtwr kxnzrkrlzng. 11:16 Drtc' amrlx kcng tzmnczlbzng mz zmatq ngr King r Rom, lrmakxtr kcng mrlcde tzvz-nqblqlr nqm q lc. A' trngiu drtwr ngde kx navz-nqblqku mzli ka mrka mz trmctu nyzgu.



kx nimu lrmakxtr akipx-lzbqmu mz dzbedeng mzli kc tqyrlwr-lxblr-ngrnamu mz nzangiongr. X lxngitix kxpipz kx nrpa lc ngi da angidr. <sup>19</sup> A' krlz-kzx kx kzdung nzakipxngr lcng nzvzpxmqng mz nztu-amqngikr kzdung nimu mz da kxtubq, murde ma tqprtrpzmu mz kxnzvrbrng, a' nakrlzngr neke tubq mz nzobqkr Gct. <sup>20</sup> Kxmule-esz', a' mzli kc tqyrlwr-lxblr-ngrnamu mz nzmulvzngr Kxetu rgu, nqm q krmu atrkatile nide, mz nzakipx-lzbq-krmu. X apusr-ngrnamule trngiu Nzmungrkxtr. †

<sup>21</sup> Murde kxmule-esz' yrlwr-lxblramu, a' leplz amrlx trnzakilru dakxnzng nadr badr kztedrng. A' kc doa ngq-tpwzle dakxnzng nade. X mzli lc nimu kxnzngi bcnyrng nzmuzpwxng x nzrmnq-zlwzng waen, a' leplz kx trpnzng scdr da nzbrtaleng. <sup>22</sup> Bzkq aleamu da lc. A' mu-kaiamu mz ma nyzmung, x mz nibrde sc tqyrlwr-lxblr-ateamu badr kztemung kxnzrlxngiting. Murde amyatibzmu drtq leplz kcng tzbrtaleng mz nzobqszo-krmu lrmakxtr neng Gct. ? Nike napibo bamu? ?Mrlz nzglqlz-krnge nimu mz da lc? Trtingr!

---

† **11:20** Mzli lc pnz, leplz amrlx mrlc nzakipx-lzbqng mz dzbede nzling, dzbede kx nznginidr bcnyr x dzbede kx trpnzng scdr da. Mz nqm q krdr, mzli kc leplz tzvz-ngrmlr mz ma nyz kzdq bcnyr, bcnyr lc badr kztedeng nzmung me esz' mz dakxnzng kx mrlzvxi kxkqlu. A' leplz kx trpnzng scdr da, nzmung me kzble mz ma nyzde, x dakxnzng nadr pipz. X mrkc twxibu-ngrdr nzkrzlzr nzmrcng leplz kx nzmuzpwxng. Mz letz lc, Pol nyangr drtwrde murde kxnzrlxngiting kx nzngi bcnyrng nzvz-nqblqlr nqm q lcpwz mz nzyrlwr-lxblrkr kxnzrlxngiting ma nyzdr mz nzangiongr x mz nzprtr-krdr mz Nzmungrkxtr.

<sup>23</sup> A' nqmq kc tqkam Kxetu bange x aprcebo bamu nide sele. Jiszs, mz nrlckxbq ngr zbq kc tqamwangr Judzs nide, kalzmle bret. <sup>24</sup> Awingrbzle mz Gct, lpxile, x rpibzle mz ncblo nedeng kx, “Krlc ncvr nrkrdrtqnge, nzkabz bamu. Rtrngzti-zvzbzmu da lc mz nzdcpxkr drtwrmu ninge.” ✧ <sup>25</sup> Mz nqmq lcpwz, mz nibr nzmulvz-krdr Nzamyangr, glqlzmle kap ngr waen, x rpibzle badr kx, “Waen lc ngi rkx ngr Nzesz'tikr Drtwr Gct Kc Ate tqyrlqzbzle badr leplz mz nzyrleokr mepyr rnge. Rtrngztibzmu da lc mzli kznikeng mnq-ngrnamule, mz nzdcpx-zvzkr drtwrmu ninge.” †

<sup>26</sup> Drtwr ngrde kx, mz nzngq-krmu bret lc, x nzrmnq-krmu waen lc, navz zvz nzaelwapx-krmu nzbzkr Kraes nigu amrlx, vz vz krlzmle mzli kx yzlu-mou-ngrmle.

<sup>27</sup> Mz nzmu-krde lcde, doa kx vz zvz nzamane-krde Kxetu mz Nzmungrkxtr, da kc tzwai kzdung nimu, atrkatilr Nzesz'tikr Drtwrdr badr Gct kc tqyrlqle mz nrkrdrtq Mrlxde mz nzyrleo-krm mepyr ngrde. <sup>28</sup> Dekc, na-aoti-angidr-kaingr drtwrmu nqmq krmu mz Nzmungrkxtr. X sc tqmupeamu bret x tqrmnqpeamu waen ngrdeng kc ate, murde ma tqatrkatiamu kztemung mz nqmq krmu. <sup>29</sup> Murde Gct sa na-ayrplapxle

✧ **11:24** Asaea 53:12; Matiu 26:29; Mak 14:22-25; Luk 22:14-20

† **11:25** Nzmungrkxtr ngi rkx ngr nzprtrngr mz da kxmrlzting keng tzvzpxmqng mz Nzesz'tikr Drtwr lc Tqmrna. Krlcde seleng—nzippxng alwx, nzamrlzng nrkrdrtq mz zyagox, nrxngitingr kx xplr, nzesz'tikr drtwr kxnrlxngiting, nzatubqtikr Jiszs nidr mz nzobqkr Gct, x kzdu-kzng da kxnzmulr lcong. [Jeremaea 31:31-34; Nzrlaszng 24:8]

doa kznike prtr mz Nzmungrkxtr, a' vz-rbr murde trkrlzleu drtwr ngr nrkrdrtrq Kxnmcpx. ✧ <sup>30</sup> Dekc kxnzkqlung mz nimu tzyangrngape-ngrdr x tzyagoxpe-ngrdr. X kzdung nimu tzbzpe-ngrdr. §

<sup>31</sup> A' naobqtr-kaiku mz nabzgu, mz nzmncz-krbzku mz me pnz drtwr Kxnmcpx, murde ma tqprtrku mz nzayrplapx-alokr Gct nigu. <sup>32</sup> A' mzli kc tqmc-ngrde kx vz-rbrku mz nqmq krgu, ayrrplapxle nigu, murde natekqtrku nqmq nr drtwrgu x trpnzngz nzayrplapx-alo-krde nigu mz Hxl.

<sup>33</sup> Mz nzmukrde lcde, kx mzlengeng x inwengeng, mzli kc tqyrlwr-lxblr-ngrnamu mz Nzmungrkxtr lc, aodu-lzbqamu mz nivz. <sup>34</sup> Doa kx suti drtwrde nelzde nakrlc angidr, namu pnz kai ma nyzde, murde ma tqbatrpzle nzayrplapxkr Gct nimu mz nzvz-rbr-krmu mz Nzmungrkxtr.

Mzli kc navz-ngrmc, sa napi-zpwx-mopwo du da, mz nzayzlu-krbo nike piamu mz letz scmu.

## 12

### *Zmatq Kxmyapxbzng Kcng Tqkam Mqngrkxtr*

<sup>1</sup> Mzlengeng x inwengeng, mzli ka suti drtwrnge nzalvztr-krnge nimu mz zmatq kcng tzvzpxmqng mz Mqngrkxtr, murde nzao-krmu drtwrmu naopx. <sup>2</sup> Krlzamu kx mzli kc tqmnc-mrbrbe-ngrnamu, drka' nzvectrplr nimu mz

---

✧ **11:29** 1 Korint 10:17 § **11:30** 11:29 Murde kxnzrlxn-giting amrlx kxnzmulr esz' mz nzobq-krde, mz nzngini-krdr nrkrdrtrqde. 11:30 Trngiu drtwr ngrde kx zyagox x nzbzngz amrlx nzvzpxmqng mz nzayrplapxkr Gct leplz.

nzangio-krmu da kxnlz, kcng trnzluung. <sup>3</sup> A' mzli ka suti drtwrge kx nakrlzamu kxmu nzglx-krmu kxnmncng mzlilxlr kznike kx aycmnele ncblo, kx ngi Mqngrkxtr o drka'. Murde doa kx aycmne Mqngrkxtr trtxpnzng nzrpi-krde kx, "Pibqtix Jiszs," a' ngi txpwz kx aycmne drka'. X doa kx mnepx-ngrm Mqngrkxtr, nide txpwz kx krlzle nzrpi-krde kx, "Jiszs nide Kxetu kxmyapx-esz'ngr."

<sup>4</sup> A' bzkq aoti txpwz drtwrmu zmatq ngr nzymne-ngrbz mz Gct mz natq lr mrkzbleng. Murde zmatq nzklung kx bletipx-lxblrng kcng tzvzpxmqng mz Mqngrkxtr kcpwz esz'. <sup>5</sup> Da kc tqwai nzwzng kxkqlu kx bletipx-lxblrng mz nzwztr-ngrbz mz Kxetu kcpwz esz'. <sup>6</sup> X nzkrlzng kxkqlung kx bletipx-lxblrng kx nzvzpxmqng mz Gct kcpwz esz', mz nzalekr leplz nzwzng kc tqaprcbzle badr. <sup>7</sup> A' Mqngrkxtr kamle bagu zmatq ngr nzwzng lcng tqbletipx-lxblrng, murde naokatrku kztegun kxnzrlxngiting. <sup>8</sup> X zmatq lcng tzbletipx-lxblrng tqka Mqngrkxtr nidr seleng: nzrpi-xngr nrpa ngr nzyrplapxng, nzrpi-xngr nrpa ngr nzkrlzng, <sup>9</sup> nzrlxngitingr kx xplr-esz'ngr, kzdung zmatqng ngr nzamlzng kxnzyagoxng, <sup>10</sup> zmatq ngr nzalengr da kxmatq, nzrplzpxngr nrpa kx kabz Gct, nzrglxng namrlzur kxnmncng mzlilxlr kc tqwz, nzymne-ngrbz mz Gct mz natq lr mrkzbleng, x nzrpi-xngr drtwr ngr natq lr mrkzble lcng. <sup>11</sup> A' Mqngrkxtr kcpwz esz' kc tqrka zmatq ngr nzwzng lcng tzbletipx-lxblrng. X sc tqkatipebzle mz leplz mz nzvz-nqblq-krde me pnz drtwrde.

*Naesz'tiku Mz Nrkrdrdq Kraes, Kxmule-esz'  
Nzwz-krdung Kqlu*

<sup>12</sup> Nrkrdrdqm esz', a' dalr nrkrdrdq kqluti. Mz nqmq lcpwz, kxmule-esz' kqluku x zmatq ngrgu bletipx-lxblrng, a' nigu nrkrdrdq kxesz', mz nzprtr-krdu mz nrkrdrdq Kraes. <sup>13</sup> Murde nigu amrlx nzaxvctrpzku mz nrkrdrdq lc esz', mz nzawrkxtrkr Mqngrkxtr nigu. Kxmule-esz' nigu lr Jiu o trtingr, x kxmule-esz' nigu kxnzawz-nrbalqng o trtingr, a' Gct avzomle bagu amrlx Mqngrkxtr kcpwz esz'.

<sup>14</sup> Nrkrdrdq trngiu da kxesz'ti, a' dalr nrkrdrdq kqluting x nzwz-krdrng bletipx-lxblrng. <sup>15</sup> Mz nzmu-krde lcde, bzkq nanyc nrkrdrdq rpile kx, "Trprtrwxu mz nrkrdrdq, murde trnipc'u mqde." <sup>16</sup> X bzkq nradrtq rpile kx, "Trprtrwxu mz nrkrdrdq, murde trnipc'u mzte." Murde nidr amrlx nzprtrng mz nrkrdrdq. <sup>17</sup> Nrkrdrdq atwrnrngr kx ngi txpwz mz, trxlru da mz nzmrbrpx-krm nradrtq. X nrkrdrdq atwrnrngr kx ngi txpwz nradrtq, trtengiu da mz nzmrbrpx-krm nctq. <sup>18</sup> Nzwzngr amrlx nzokatrllr nrkrdrdq. X Gct yrlqle kxnzrlxngiting amrlx badr zmatq ngr nzwz-krdr me namnc-ngrdr mz nrkrdrdq Kraes, mz nzvz-nqblq-krde me pnz drtwrde. <sup>19</sup> Mz nzrngisckr kxnzrlxngiting amrlx zmatq kcpwz mz nzwzngr, drtwr ngrde kx nzwzngr kxnzkqlung nzmrbrpxmqng mz nrkrdrdq Kraes. X nrkrdrdq kxmule lc, trkrlzleu nzale-krde nzwzkr nrkrdrdq amrlx. <sup>20</sup> Takitrde zmatq ngr nzwzngr kxnzkqlung kxbletipx-lxblrng nzwz-lxbl-krdr mz nrkrdrdq kxesz'.

<sup>21</sup> Mz nzmukrde lcde, trtakitrdeu nar nzrpi-krbzle mz nanyc kx, “Nzwz-krm mane.” X trtakitr-kzdeu mq nzrpi-krbzle mz mz kx, “Nzwz-krm mane.” <sup>22</sup> Kxmule-esz' kzdung kxnpzprtrng mz nrkrdrdq trnzxprrung, a' nzwz-krdr nzmyatxpx-kzng. <sup>23</sup> X dalr nrkrdrdqgu kx nzobqszong x kx myangr drdqgu, aclve-angidrku x amatqku nidr mz nzakqlvz-krku nidr mz lrpz, murde nrkrdrdqgu atwrnrngr natakitrde leplz nzmc-krdrle. <sup>24</sup> A' dalr nrkrdrdqgu kx takitrde nzrmcng, trnakxmsur-ngrguu nidr lc. X kxmu-kzpwzle lc mz nrkrdrdq Kraes. Murde suti drtwr Gct kx nzamatq-krku x nzaclve-krku krkcng tzmatineng namyaszpxle nzamatq-krku kxnzamatqpeng. \*

<sup>25</sup> Murde trsutiu drtwr Gct kx leplz nzakipx-lzbqng, a' nzaclve-krdr kztedrng kxnzrlxngiting narsakrlrngr. <sup>26</sup> X mz drtwr lc, nzmudrq kzdq doa mz nrkrdrdq Kraes naetqle, nznngitr lxblr kztedeng amrlx. X nzmudrq doa nzamatqle, kztedeng amrlx naprtr-kzng mz nzabrtz-krde.

<sup>27</sup> Nimu amrlx ngrmu nrkrdrdq Kraes. X doa kxes' mz nimu prtr mz nrkrdrdq lc x nzwz-krde myatxpx kz. <sup>28</sup> Mz nzwzkr nzaclvengr lrmakxtr, Gct

yrlq-ayrnr-ngrde nzwzkr aposol,

krali nzwzkr profet, x

kratq nzwzkr kxnzalvztrng mz natq Gct x mz nqmq krde.

X yrlq-kzle zmatq kxbletipx-lxblrng lcde seleng:

\* **12:24** Mrlz nzamatq-krku kxtrpnzng scdr da, doa kxnztopwzng x olvz namyaszpxle kx ngi bcnyrng x kxnzsetung kcng tzamatqpeng.

nzalengr da kxmatq,  
 kzdung zmatqng ngr nzamrlzng  
 kxnzyagoxng,  
 nzokatr-zlwzng leplz,  
 nzmrcngr lrpzki kx navzki lrmakxtr, x  
 nzymne-ngrbz mz Gct mz natq lr mrkzbleng.  
<sup>29</sup> Trngiu leplz amrlx kx nznginidr aposol, profet,  
 kxnzalvztrng mz natq Gct, o kxnzaleng da  
 kxmatq. <sup>30</sup> X trngiu leplz amrlx kz kxnzamrlzng  
 kxnzyagoxng, kxnzymnebzng mz Gct mz natq  
 lr mrkzbleng, o kxnzrpipxng drtwr ngr natq lr  
 mrkzble lcnq.

*Nivz Namyapx-esz'ngr*  
*Mz Nzwztr-ngrbz Mz Gct*  
*Mz Zmatq Kxmyapxbzng*

<sup>31</sup> Mrlz nzsuti-zlwzkr drtwrmu zmatq  
 kxmyapxbzng mz nzokatr-krmu lrmakxtr. A'  
 mzli ka napibo bamu nqm q kx myapx-esz'ngr  
 mz zmatq lcnq.

## 13

<sup>1</sup> Doa kx traelwapx-ngrpwzleu nivz mz leplz,  
 mane zmatq ngr nzymne-krde mz natq lr  
 mrkzbleng x natq enjrl kz. Murde apule nzrl-  
 plakr natq dram kxmznrngr mz nzrtztrng. <sup>2</sup> X  
 doa kx trmrlztleu leplz, mane kz zmatq ngr  
 nzplzpx-krde nrpa kxkabz Gct, x nzrpipx-krde  
 nrpa ngr nzrkrizng, x nzkriz-krde da angidr  
 kx yc-kapq. X mane kz nzxplrkr nzrlxngiti-  
 krde kx krizle nzabrkalz-ngrm newz. <sup>3</sup> X doa  
 kx traelwapx-ngrpwzleu nivz mz leplz, mane kz  
 nzglqpx-lzbq-krde nzamwa-krde drtc' nyzdeng x

dztudeng amrlx mz nzokatr-krde kx trpnzngr scdr da.

<sup>4</sup> Murde doa kx aelwapx-ngrbze nivz angidr vz-nqblqle nqm̄q lcde seleng: nzvz-nrwx-ngrbz mz leplz, nzrycng drtwr leplz, nzokatrng leplz, x nzavzo-lzbq-ngrbz mz leplz. A' mrlx lc bzkq glqpx-lzbq̄bz mz leplz, bzkq kcmnz-ngrbze dztudrng, <sup>5</sup> bzkq amatinede leplz, bzkq trkibrbz mz leplz, bzkq drtwrde ngya-anibz mz leplz, x bzkq aboi drtwrde da kxvz-rbrtibz leplz bade.

<sup>6</sup> Doa ngr nivz, drtwrde vz zlwz mzli kc tzalengr leplz da kxdrka'ngr, a' abrtzlvzle mzli kc tzalengr da kxtubq. <sup>7</sup> X nivz angidr drtwr ngrde kx doa tu-zvzbz mz nibr leplz mz nzokatr-krde nidr kxmule-esz' nqm̄q krdr trka. Traylzu-mopwzu da kxtrka mz da kxtrka, a' drtwrde abr-zvzle, x obqtipxle nzrtekqtrng nqm̄q nr drtwr.

<sup>8</sup> Nivz trpnzngr nzyrkrpx-krde. A' zmatq amrlx ngr nzwztr-ngrbz mz Gct sa nayrkrpxng mzli kc nayzlu-ngrm Jiszs, kxmule-esz' nzplzpxngr nrpa kx kabz Gct, nzymne-ngrbz mz Gct mz natq lr mrkzbleng, x nzrpipxng nrpa ngr nzkrlzng.

<sup>9</sup> Murde mzli ka mz nrlc ka, rblxbz mz doa nzkrlz-atwrnr-krde x nzplzpx-atwrnr-krde drtwr ngr nrpa kc tqkabz Gct bade. <sup>10</sup> A' mzli kc nayzlu-ngrm Jiszs, sa na-atutrle da amrlx, x zmatq lcn̄g amrlx sa namrbrng.

<sup>11</sup> Mz kzdq nzymne-ebzpxng, mzli kc tqtopwzbe-ngrne, nzymne-krnge, nzkrlz-krnge, x nzao-krnge drtwrnge nztakitrd drtwr doa kxtopwz. A' mzli ka nipenge ncblo, x yrlqtxopex nqm̄q krdr doa kxnztopwzng, murde nqm̄q krnge natakitrde ncblo. <sup>12</sup> Mzli ka nzrmc-krngu



nzalvztrngr angidr apule nzobqtr-krngu mz dzpq kx kamrbrngr. Murde trkrlz-atwrnr-ngrguu da lcnq. A' Gct krlz-atwrnr-ngrde nigu. X mzli lc navzm, sa nakrlz-angidrpeku da mz nzmnc-zvz-krbzku mz Jiszsz.

<sup>13</sup> Nqmq nr nabzgu tq kx nayc-along nidr seleng: nzbtrtkr drtwrgu Gct, nzobqtipx-krngu nzatutr-krde nzesalz-krdeng, x nzaelwapx-krbzku nivz lrde mz leplz. A' nivz dela tqmyapx-esz'ngr zvz.

## 14

*Gct Kabzle Zmatq Kxmyapxbzng Mz Leplz Nedeng Mz Nzaxplr-lzbq-krdr*

<sup>1</sup> Mz nzmu-krde lcde, drtqmu navq zvz mz nzmrlzti-krmu leplz. X mzli lcpwz nasuti kz drtwrmu nztwz-krmu zmatq ngr nzwztr-krbzmu mz Gct, myapxbz zmatq ngr nzrplzpxngr nrpa kx kabz Gct. <sup>2</sup> Mzli ka suti drtwrmu kx leplz amrlx naycmnebzng mz Gct mz natq lr mrkzbleng. A' doa kxmule lc trycmnepwzu mz lrmakxtr. Murde mqngr doa lc ycmnetr-ngrde da kx yc-kapq x leplz trnzkrzlru drtwr-ngrde. <sup>3</sup> A' mzli kc leplz nzlalztq-ngrbzlr mz doa kx plzpxle nrpa kx kabz Gct, nrpa lc axplrle nzrlxngiti-krdr, apqtrle drtwrdr, x amqtr-kzpzle drtwrdr. <sup>4</sup> Mrlx kc tqycmnebz mz Gct mz natq lr mrkzbleng, okatrle nide esz'-krde. A' mrlx kc tqplzpxle nrpa kx kabz Gct, okatrle lrmakxtr atwrnrngr. <sup>5</sup> Suti drtwrnge kx nimu amrlx nakrlzamu nzymne-krbzmu mz Gct mz natq lr mrkzbleng. A' sutitx zlww drtwrnge kx

naplzpaxamu nrpa kx kabz Gct. Murde mrlx kx plzpxle nrpa kx kabz Gct, nzokatr-krde lrmakxtr myaszpxle mrlx kx ycmne txpwz mz Gct mz natq lr mrkzbleng, a' trpipx-kzleu drtwr ngrde. A' nzmu napipx-kzle drtwr ngrde, mrlx lcng li nzsakrlrng mz nzokatr-krdr lrmakxtr. <sup>6</sup> Mzlengeng x inwengeng, nzmu naycmnebo mz Gct mz natq lr mrkzbleng, mz nzyrlwr-lxblr-krge, trkrlzleu nzokatr-krde nimu. Murde mz nzokatr-krge nimu naycmnebo bamu mz natq kx krlzamu, mz nzyapwxtipx-krbo bamu da kxyc-kapq kx aelwapx-ngrm Gct bange, o mz nzpipx-krbo nrpa ngr nzkrlzng, o mz nzplzpx-krbo nrpa kx kam Gct bange, o mz nzalvztr-krge natq Gct.

<sup>7</sup> Na-aoti drtwrmu nzyrnikr gita. Nzmu trnzamqngi-zpwxu nqvi lrdeng, rblx nzkrlez-krmu nabz kc tzayrningr gita kc, x trokatrleu nimu nzngr-krmu nabz lc. <sup>8</sup> X na-aoti kz drtwrmu ngrlrvea nzvxutr-krde trpu. Nzmu natqde trnaopxleu, rblxbz mz ncblo ngr vea nedeng nzoliqti-krdr nzotangr. <sup>9</sup> Kxmu-kzle lc mzli kc tqangio-ngrnamu. Nzmu natq ncblo kx trpnzngr kx rkrlz, rblx nzokatr-krde leplz. Nzycmnekr ncblo kxmule lcde mane, murde vz lxlrtngr. <sup>10</sup> Da zpwxtx kx natq kqlu mrka mz nrlc, x natq lcdeng amrlx kzdung leplz nzyrplatitr nardr. <sup>11</sup> A' mz nzycmnekr ncblo mz natq kx trkrlzwxu, apumle bange lr mrkzble, x apu-kzpo bade lr mrkzble, murde trkrlzkru nzycmne-etr-krgr. <sup>12</sup> Kxmu-kzle lc mz nimu. Mz nzvqtikr drtqmu zmatq ngr nzwzngr lcng, mrlz nzsuti-kzkr drtwrmu zmatq ngr nzaxplrng lrmakxtr.

13 Mz nzmukrde lcde, ncblo kx twzpele zmatq ngr nzymne-ngrbz mz Gct mz natq lr mrkzbleng, nakrka'-ngrbzle bade zmatq ngr nzrpipxngr drtwr ngr natq lr mrkzble lcnq. 14 Murde mzli kc tqycmne-ngrbo mz Gct mz natq lr mrkzbleng, mqngrnge krka', a' drtwrnge trprtrpwzu mz nzkrka'ngr lc. 15 Delc, pnzpe drtwrnge kx mqngrnge sa nakrka'bz x nangrbz mz Gct mz natq lr mrkzbleng mz nzangio-krnge nide mz nzmnc-krnge esz'-krnge. A' drtwrnge sa nakrka' x nangrbz mz Gct mz natq leplz kcng tqangio-lxblrkr badr. X navz-nqblqamu natqnge lcnq. 16 Murde mz nzglqpx-krm Gct x nzawikrbzme bade mz natq lr mrkzbleng, rblxbz mz kztemqng nzesz'tikr drtwrmu badr mz nzkrka'-krm lc. 17 X nzkrka'ngr kxmule lc, takitrde nzawi-ngrbz mz Gct, a' trokatrleu leplz. 18 X awi-ngrbo mz Gct kx nzymne-krbo bade mz natq lr mrkzbleng myaszpx-zlwzle nimu. A' alex da lc mz nzmnc-krnge esz'-krnge. 19 Murde mz nzyrlwr-lxblrkr lrmakxtr, mz drtwrnge nzpipx-krbo mz leplz nrpa kxmrbc kx yrplatitr nardr myaszpx-zlwzle nzymne-aboi-krbo mz Gct mz natq lr mrkzbleng, kx tryrplatitru nardr.

20 Mzlengeng x inwengeng, mz zmatq ngr nzwznglcnq, bzkq apuamu doa kxnztopwzng mz nzktitxpx-krmu zmatq ngrdr. A' na-apuamu ncblo kxbrpe mz nzwz-krmu mz zmatq lcnq mz nzokatr-krmu kztemung. A' mrlz kz nzapukrmu doa kxnztopwzng murde trpnzu drtwrdr nzprtr-zvznglcnq mz da kxdrka'ngr. 21 Mz Nzryrn-grkxtr, rpi Yawe kx, "Sa naycmnebo mz leplz nengeng mz natq lr mrkzbleng. Sa nangi rkk

*ngr nzayrplapx-krnge nidr murde trnzlxngitilru natqngeng. Kxmule-esz', a' sa napxtxpx-zvz-ngrdr nzvz-nqblq-krdr ninge.*" ☆ \*

<sup>22</sup> Mz nzmu-krde lcde, nzycmnekr kzdq kxrlxn-giti mz natq lr mrkzbleng x trpnzng r do a kx rpiwx drtwr ngrde, trngiu r kx ngr nzabrtzlvzkr Gct nide. A' sa nangi kz r kx ngr nzayrplapxkr Gct kxtrnzrlxngitiung. Murde mz nzpxtxpx-krdr nzycmnengr kxnmulr lcng, sa napxtxpx-kz-ngrdr Nrpakxmrlz, x nzprtrbeng mz nzayrplapxng. A' nzplzpxkr kzdq kxrlxngiti nrpa kx kabz Gct bade, ngi r kx ngr nzabrtzlvzkr Gct nide, murde okatrle kxnrzlxngiting x tratrkatileu kxtrnzrlxngitiung. <sup>23</sup> Mz nzyrlwr-lxblrkr dzbe lrmakxtr nyzmu, trmrlzu nimu amrlx nzycmnekrbzmu mz Gct mz natq lr mrkzbleng. Murde nzmu kxtrnzrlxngitiung o kxtrnzkrzlru zmatq lc, kx nzprtrpzng bamu, sa narpilr kx lukurnr-ngrnamu o aycmnele nimu drka'. <sup>24-25</sup> A' mrlz nimu amrlx nzplzpx-krmu nrpa kx kabz Gct bamu. Murde nrpa lcng amrlx nzkrzlr nzprtrkrdr mz nabz leplz lcng mz nzaelwapx-krbzlr badr kx nzaleng alwx x takitrde nzayrplapxkr Gct nidr. X naokatrle nidr mz nztekqtr-krdr nqmq nr drtwrdr mz nzlxngiti-krdr Jiszs. X sa nayrngzobzng mz Gct mz nzangio-krdr nide. X

---

☆ **14:21** Asaea 28:11-12 \* **14:21** Suti drtwr Gct kx leplz nedeng nakrlzlr kx ycmne-kaipz badr mz natqdr, a' nzpxtxpx-ngrdr nzvz-nqblq-krdr nide. Mz nzmu-krde lcde, ayrlapxle nidr mz nzrlr-krbzle mz lr Asiria nzaovxio-krdr nidr. X lrmrkzble lcng nzycmneng mz natq kx rblxbz mz lr Israel nzxlrng. Natq lr mrkzbleng ngi r kx ngr nzayrplapxkr Gct kxtrnzrlxngitiung.

narpilr kx, “Gct sc tqmnc-zpwxbz bamu mrka.”

*Nqmq Ngr Nzyrlwr-lxblrngr Kxmrlz*

<sup>26</sup> Mzlengeng x inwengeng, da kx navzpxmqng mz nzalvztr-krnge lc nide sele. Mz nzyrlwr-lxblr-krmu takitrde doa kxesz' mz nimu nzprtr-krde mz nzangiongr lc, mz nzrlwx-krbzle kzdq nabz kxtr, o mz nzalvztr-krbzle kzdq da, o mz nzaelwapx-krbzle kzdq da kxyc-kapq, o mz nzymne-krbzle mz Gct mz natq lr mrkzbleng, o mz nzrpipx-krbzle drtwr ngr natq lr mrkzble lcong. Murde da kxmyapxbz nzokatr-krmu lr-makxtr atwrnrngr. <sup>27</sup> A' mz nzaki-krmu nzymcnengr, rlrtr-ngrpwo leplz nali o natq kx naycmnebz mz natq lr mrkzbleng. X trtakitrdeu nzymne-krdr mz nzwrde kxesz'. X nangi dq doa kx napipx-zvzbzle drtwr ngr natqdrng. <sup>28</sup> A' nzmu kx trpnzngr leplz kx rkrlz nzrpipxngr drtwr ngr natq lr mrkzble lcong, e leplz kcng tzymneng mz natq lr mrkzbleng namnc-lrping x naycmne-nabu-tpwzng esz'-krdr badr Gct. <sup>29</sup> X mou, rlrtr-ngrpwo leplz nali o natq kx narplzpxng nrpa kx kabz Gct badr. X kzt-edrng naobqtrpzng mz nrpa lcong mz nzkrlzng kx nztubqng amrlx o mwx kzdung natqdrng vz-rbr, murde drtwr ngrdr tr-rsakrlr-ngru mz Nzryrngkxtr. Mz nibr nzymnekr kzdq doa, vz-nqblq-mouamu nqmq lc x rlr-ngrbzmu mz kzdung kz leplz kxli o tq nzplzpx-kz-krdr nrpa kx kabz Gct badr. <sup>30</sup> Nzmu kzdq doa tulz mz nzplzpx-krde nrpa kx kabz Gct bade, x mzli lc tqycmne-ngrde, Gct ka-kzpzle kzdq kz nrpa mz kzdq kz doa, doa krali lc natulz. X krkc kai

nawxbuo x namnc-lrpi mzli kxpi pz mz nzhrlr-ngrbz mz doa krli nzplzpx-kz-krde nrpa scde. X krkc kai sc tqplzpxpe-moule nrpa scde mz nzayrkrpx-krdele. <sup>31</sup> Mrlz leplz amrlx nzplzpx-krdr nrpa kx kabz Gct badr, murde leplz amrlx naxlrlr nrpa lcng x na-apqtrpzlr drtwrdr. <sup>32</sup> X mz zmatq ngr nzhrlzpxngr nrpa kx kabz Gct badr, zmatq lc ycepbz badr mz nzaclvekrdrle. Murde Mqngrkxtr trpnzng nzhrtulrtrkrbzle mz leplz nzaelwapx-krbzlr zmatq lcng tqkabzle badr. <sup>33</sup> Murde mz dzbe lrmakxtr amrlx nyz Gct, trsutiu drtwrde lrmakxtr nzale-krdr da kx tropxu mz nzhrlzkr leplz. A' suti drtwrde kx da amrlx namwitr-lxblrng mz nrwx.

<sup>34</sup> Kzdung nimu nzvz-rbrng mz nzhrlz-krmu kx, "Olvz bzkq nzhymneng mzli kc tqyrlwr-lxblrngu. A' namnclzbzng mz zmatq ngr ncblo ngrdrng, da kc tqwai nzhpikr Lou sc Mosis le. <sup>35</sup> Nzmu kx tzsuti drtwr olvz nzhrlz-krdr kzdung da, naveati-krizpwzlr mz ncblo ngrdrng mz ma nyzdrng. Murde myangr drtq olvz nzhymne-krde mz nzhrlwr-lxblkr lrmakxtr." †

<sup>36</sup> Vz-rbramu murde natq Gct trvzpxpuu bamu. Bzkq glqpx-lzbqamu mz nzhrlz-krmu kx nimu txpwz kx rkriz nzhokaetipxng drtwr ngr natqde.

<sup>37</sup> X nimu leplz kcng tzhrlz kx rngiscmu zmatq

---

† **14:35** Kxzetu r Nzhryngrkxtr drtwrdr tresz'tiu mz drtwr ngr ngalrde lcng li, 34-35. Mz nzhrtkqtr-krgr mz Natqgu, vz-nqblqkr ncblo kcng tzhrlz kx ngalrde lcng trngiu drtwr Pol, a' ngi drtwr kzdung lr Korint. Murde natq lcng trnesz'tiu mz kzdung kz natqdeng mz kzdung kz ngalrdeng. X mou Lou sc Mosis trpileu kx olvz bzkq nzhymneng mzli kc leplz neng Gct tzhrlwr-lxblrngdr.

ngr nzrplzpxngr nrpa kx kabz Gct o zmatq kc-kzng tqkabz Mqngrkxtr mz leplz, nakrlzamu kx da lcng amrlx tqpipxbo bamu ngi natq kx katimqng Kxetu rgu Jiszs. <sup>38</sup> A' bzkq vz-nqblqamu doa kznike trglxleu nztubqkr natqnge lcng.

<sup>39</sup> Mz nzmukrde lcde, kx mzlengeng x inwengeng, navqti drtqmu nztwz-krmu zmatq ngr nzrplzpxngr nrpa kx kabz Gct. A' bzkq rpwa'-ngrbzmu mz leplz nzycmne-krbzlr mz Gct mz natq lr mrkzbleng. <sup>40</sup> Mz nzyrlwr-lxblr-krmu, aleamu da amrlx mz nqm qkxmrlz kx takitrde nzmnc-zpwx-krmu.

## 15

*Jiszs Tulz-mop Mz Nzbzngr Mz Nrkrdrtdede Angidr*

<sup>1</sup> Mzli ka, kx mzlengeng x inwengeng, napi-mopwo bamu Nrpakxmrlz kc tqyapwxtipebo bamu. Lxngitiamu Nrpakxmrlz lc x rpiamu kx sc tqvz-zvzbe nztu-amqngi-krmu elr. <sup>2</sup> X mz nztu-amqngi-krmu mz da lcng tqalvztr-ngrne nimu, sa naprtr-kzamu mz nzrlapxng x da kxmrlzting amrlx kx nzvzpxmqng mz Nrpakxmrlz lc. A' nzmuzrlxngiti-krmu kx tqpi txpwz naomu le, trnaprtrwamuu elr. <sup>3</sup> Aprcpebo bamu nza-lvztrngr kx nzka-kaipqng aposol kc-kzng bange. Da lcng tqlxngitiku kx myapx-esz'ngr nidr seleng. Nzbzkr Kraes xpele alwx ngrgung, murde Gct naipqle nigu, da kc tqwai nzpikr Nzryrngrkxtr le. ✧ <sup>4</sup> X nzyrtzm q x Gct atulz-mople nide mz zbq kratq ngr nzbz-krde, da kc tqwai nzpikr

Nzryrngrkxtr le. ✧ <sup>5</sup> Zbz adcpX-lzbqBz mz Pita, x mz nibrde badr ncblo nedeng kcng nzpnu-esz'-nrade-li. \*

<sup>6</sup> X mz nibrde, adcpX-lzbq-mopwz badr kxnzr-lxngiting nzmyaszpxlr trtqki-kxnzlvqn (500) mz nzwrde kc esz'. Kxmule-esz' kzdung nidr nzbzpeng, a' nzKqlung kx nzlubeng mzli ka tqryr-ngrbo bamu. X nzKrlz-angidr-kzlr kx tulz-mop mz nzbzngr mz nrkrdrdqde. <sup>7</sup> Zbz adcpX-lzbq-kzpz mz mzlede Jemes, x mz nibrde adcpX-lzbq-kzpz badr aposol nedeng amrlx. ✧ <sup>8</sup> X kzdung yiz mz nibr nzvzdz-krde Heven, adcpX-lzbq-kzpq bange. ✧ X mz nzlxngi-ate-krnge nide, apux doa kx nzmika-rbr, a' twzpele nzlungr. <sup>9</sup> Murde kxmule-esz' mzli kc tqatrkatizlwzx lrmakxtr ne Gct, x trtakitrdeu nzngini-krnge aposol nede, a' mzli ka prtrpebo badr, kxmule-esz' tr-rsakrlr-ngrgru badr mz nzmyalz-krdr. ✧ <sup>10</sup> Nzlxngiti-krnge Jiszs x nzngini-krnge aposol nede nzvzpxmqng mz zmrlz ngr Gct kxmyalz. X zmrlz ngrde lc trmaneu, murde nzyapwxtipx-krnge Nrpakxmrlz mrkang kqlu myaszpx-zlwzle nzwzkr aposol lcng amrlx. A' trtakitrdeu nzglqpx-krdr ninge mz da lc, murde nzwz-krnge vztzpxpwq mz zmrlz lc tqmyalz. <sup>11</sup> Kxmule-esz' krkc tqyapwxtipxbzle Nrpakxmrlz bamu, nidr o ninge, a' sc tqlxngitipeamu mz nzxlr-krmule.

### *Nrkrdrdq Kxnzrlxngiting Sa Natulz-kzp Mz*

✧ **15:4** Sam 110:1; Hosia 6:2; Jona 1:17; Luk 24:46; Aposol 2:25-36

\* **15:5** Kxmule-esz' Judzs bzpe, a' nzrlwxtr-kzpz mz ncblo neng Jiszs kcng nzpnu-esz'-nrade-li. ✧ **15:7** Galesia 1:19 ✧ **15:8** Aposol 9:1-19 ✧ **15:9** Aposol 8:1-3; 9:1-2



*Nzbzngr Mz Nzvz-nqblq-krde Nztulz-krm Nrkr-drtq Jiszs*

<sup>12</sup> Mz nzlxngiti-krmu Nrpa ngr Kraes, bzkq rpiamu kx trpnzngr nzatulz-krm Gct kxnzrlxn-giting mz nzbzngr. Murde da amrlx kcng tqlxn-gitiku nztuong mz nzatulz-krm Gct nrkrdrdq Jiszs mz nzbzngr. <sup>13</sup> Nzmu natrpnzngr nztulz-krm nrkrdrdq mz nzbzngr, drtwr ngrde kx trnzatulz-kzpuu Kraes mz nzbzngr. <sup>14</sup> X nzmu Kraes nabz-alole, drtwr ngrde kx nzryapwxtipx-krgr nigr aposol mane x nzrlxngiti-krmu ngi brmrda. <sup>15</sup> Murde nzmu Gct trna-atulzpe-mopleu Kraes, aelwapx-ngrde kx pokiatitrkr Gct, mz nzrpi-krgr kx atulz-mople nide mz nzbzngr. Drtwr lc navzpxm mz nzrpi-krmu kx trpnzngr nztulz-krm nrkrdrdq mz nzbzngr. <sup>16</sup> Murde nzmu natrpnzngr nztulz-krm nrkrdrdq mz nzbzngr, drtwr ngrde kx nrkrdrdq Kraes mnclz-alom mz gq. <sup>17</sup> X nzbrtikr drtwrmu nide nzarlapx-krde nimu ngi brmrda. Murde trpnzngr nzipqpxngr alwx ngrmung x sa naprtramu mz Hxl, <sup>18</sup> da kc tzwai kxnzrlxngiting amrlx kcng tzbzszpelr nigu.

†

<sup>19</sup> X nzmu natrpnzngr nzprtr-krgru mz nzlungr kxboi kalr, mane mzli ka mz nrlc ka nzobqtipx-zvz-krgru da kx nakam Kraes bagu kalr mz nrlc kc navzm. X takitrde leplz nzyckr mz drtwrdr nigu, mz nzrlxngiti-nrbalq-krgru lc.

<sup>20</sup> Kxmule-esz', a' dazpwxtx kx Gct atulz-mople Kraes, mz nznngini-krde doa kx ayrnrngr kx

---

† **15:18** Gct mz nzatulz-mou-krmle Jiszs mz nzbzngr, aelwapx-ngrde kx nzbz-krde lc ngi blz kx takitrde nzrkatz-krde alwx ngrngung amrlx.

natulz-mou-ngrmle mz nzbzngr x trpengr nzbz-krde. Murde kxnzrlxngiting kxnzbpeng amrlx natulz-kzpqng mz nzbzngr kalr. ✧ <sup>21</sup> Murde nzbzngr prtzbz mz leplz amrlx vzpx-ngrmle alwx ngr ncblo esz', kc tqngi Adzm. X kxmu-kzle lc, nztulz-krm nrkrdrdq mz nzbzngr naprtzbz mz kxnzrlxngiting amrlx vzpx-kz-ngrmle nztulz-krm ncblo esz' kc tqngi Jiszs. <sup>22</sup> Leplz amrlx nzbzngr murde nzprtrpzng mz Adzm. X leplz amrlx kxnzrlxngiting sa nalu-mopqng murde nzprtrpzng mz Kraes. <sup>23</sup> A' nzlu-mou-krm leplz sa navz-nqblq-angidrle mzli rde kc tqyrlq Gct. Murde Kraes nanginide doa kx ayrnrngr kc tqtulz-mou-ngrmle mz nzbzngr a' trpengr nzbz-krde. X mzli kc nayzlu-mou-ngrmle, leplz nedeng sc natulz-ate-kzng. <sup>24</sup> X mz nibr da lc, sc tqkrlzpebzle nzykrpxkr nrlc ka. Mzli lc, Kraes sa naodati-kaile enqmi rdeng amrlx, kxmule-esz' ncblo o drka' x kxmule-esz' kxnzetung, kxnz-matqng, o kxnzaclveng. X sc na-aprc-atebzle doa x da amrlx mz Gct Trtede. <sup>25</sup> Murde Kraes nangini-kaide King, navz navz mzli kx nzamnclz-ngrbz enqmi amrlx mz zmatq ngrde. <sup>26</sup> X nzbzngr apu-kzle enqmi murde atrkatile leplz. A' Kraes sa naodati-kzle zmatq ngr nzbzngr lc. <sup>27</sup> Murde rpi Nzryrngrkxtr kx, “*Gct yrlqlzbzle doa x da amrlx mz zmatq ngr Kraes,*” ✧ (kxmule-esz' leplz, enjrl, drka', animol, o da kxtrnzluung), “*mz nzmetx-krbzlr bade.*” ✧ A' opx angidr kx Gct Trte trprtrpwzu mz “doa x da amrlx lcng,” murde tramnclzpwzleu nide esz'-krde mz zmatq

✧ **15:20** Aposol 26:23; Rom 8:29; Kolosia 1:18; Hibru 1:6

✧ **15:27** Sam 8:6 ✧ **15:27** Sam 110:1

ngr Mrlxde Kraes. <sup>28</sup> X mz nibr Gct Trte nzyrlqlz-krbzle doa x da amrlx lcng mz zmatq ngr Mrlxde Kraes, Mrlxde sa na-amnclz-kzpzle zmatq ngrde lc tqmyalz-esz'ngr mz zmatq ngr Trtede. X mzli lc, doa x da amrlx lcng sa navz-nqblq-moulr me pnz drtwr Trtede.

<sup>29</sup> Kzdung nimu mrla, nzlukurnr-ngrdr mz nzrpi-krdr kx trpnzngr nztulz-krm nrkrdrdq mz nzbzngr, x mzli lcpwz nzwrkxtrng mz nztekqtr-krdr leplz kxnzbpeng, murde mz drtwrdr sa naokatrle nidr. †

<sup>30</sup> ?X nzm ntrpnzngr nztulz-krm leplz mz nzbzngr, memule nigr aposol tqrlrpx-lzbq-zvz-ngrgr mz nzaetq-ngrbz drtqgr mz nzyapwxtipx-krgr Nrpa lc? <sup>31</sup> Mzlengeng x inwengeng, mz zbq kang kqlu leplz nzrpilr nanibqlr ninge, murde yapwxtipxx Nrpa lc. A' vqti drtqngc nzale-krnge nzwzngr lc, murde abrtzlvz-zlwzx Kxetu rgu, Jiszs Kxnmcpm mz nztekqtr-krde nqm q krmu kc tqvzpxm mz da angidr kcng tqalvztr-ngrne nimu.

<sup>32</sup> Kzdung ncblo mrka mz taon Efiszs, drka' mncpxm badr, x nzatrkatilr ninge. A' kxmule-esz' nzrpwa'-ngrmlr nzwz-krnge, a' tu-amqngi-zvzx mz nzyapwxtipx-krnge nrpa kx Gct atulz-mopele Jiszs mz nzbzngr. A' nzm ntrpnzngr nztulzkr leplz mz nzbzngr, nzwz-krnge mane, x trpnzngr nrade kx nayrlq-zvzbzle. X opxm kx mrlz nzvz-nqblqngr drtwr kx rpile kx, "Na-ale-

---

† **15:29** 15:28 Da kc tzwai-pnzlr mzli kc Adzm trtaoka-ngrde mz alwx. 15:29 Trpnzngr kxrklz namrlzu r nzawrkxtrngr lc. A' opxm kx drtwr Pol tresz'tiu badr mz nzawrkxtrngr lc, murde abzo mzli kc krlzmle mzli ka, namrlzu r nzawrkxtrngr lc trnzaleu lrmakxtr.

*txpwzku da kxmrlzm bagu mz nzmux-krpwzku x nzmnrqtx-krpwzku, murde ycpe pipz nzbz-krgr.”*  
 ☆

<sup>33</sup> A' bzkq nzesabrtingr nimu mz nzvz-nqblq-krmu natq lc. Murde nakrlzamu kx mz nzprtr-krbzmu mz leplz kx nzvz-rbrng mz nzrpi-krdr kx trpnzng nztulz-krm leplz mz nzbzng, nzaokrdr drtwrdr lc tqtrka sa na-atrkatile nzaokrmu drtwrmu kxmrlz. <sup>34</sup> Aclvetio-lzbqamu! Nzalezvz-krmu alwx naesakipe! X namyangr drtqmu. Murde leplz kcng tzalvztr-ngdrdr nimu da kxvz-rbr lcng, trnzkrz-pnzlru Gct.

*Nrkrdrdqgu Kxmarna Kc Natulz-mopqng Kalr Ngi Nrkrdrdq Kxblepxng*

<sup>35</sup> Mwx kzdq nimu narpile kx, “?Myx kxnamu na-alu-moungr namz ngr leplz? ?Sa nangi mou nrkrdrdq kxmibi?” <sup>36</sup> Ngqngu-plxsrq! Murde da kx nzpetio mz drtc' namibio kai mz nzlrtipx-krde da kxmarna kc nalvclzm. <sup>37</sup> Rtg da kc tzpetio nzobq-krde blepxbz mz da kc nalvclzm. <sup>38</sup> A' Gct yrlqle drtwr kx da kc nalvclzm mz rtq, navz-nqblqle rtq kc tzpetiong.

<sup>39</sup> Nrkrdrdq amrlx tr-rsakrlr-ngru. A' nrkrdrdq leplz, animol, utc, x nc nzbletipx-lxblrng. <sup>40</sup> X nrkrdrdq kxnmncng mz nrhc ka nzbletipx-lxblrng mz nzobqkr dalr bongavz. X nzlqngipxkr dalr bongavz nzbletipx-lxblrkzng mz nzlqngipxkr nrkrdrdq mz nrhc ka. <sup>41</sup> X mou, nzlqngipxkr nepi, temz, x vring nzbletipx-lxblrng, da kc tqwai-kz nzobqkr vri amrlx.

42 Kxnamu-kzle lc mzli kc na-atulz-mou-ngrmqng Gct leplz kxnbzbpeng. Murde nrkrdrdq kc tzyrtzmq mz drtc' krlzle nzbzngr. A' nrkrdrdq kc tqlu-mop blepxbz bade, murde trkr-lzleu nzbzngr. 43 Nrkrdrdq kc tzyrtzmq yangrga x nzobq-krde trka, a' mzli kc na-alupe-mou-ngrmle nrkrdrdq lc naxplr x nzobq-krde nalqngipx. 44 Nrkrdrdq kc tzyrtzmq ngi dalr nrlc ka, a' nrkrdrdq kc tzalu-mop mz zmatq ngr Mqngrkxtr takitrde nzmnc-alo-krde Heven. Nakrlzamu kx nzmncr nrkrdrdq mz nrlc ka ngi rkx ngr nzmnc-kzkr nrkrdrdq kxmrna Heven. 45 Murde Nzryrgrkxtr rpile kx, *“Adam, kc tqngi ncblo kc kai nginide leplz kxlu.”* ✧ X leplz amrlx nzbzng mz nzprtr-krbzlr bade. A' Kxnmcpvz, mz nzngini-krde ncblo kc kai tqlu-alo, x kabzle nzlungr kxboi mz leplz nedeng amrlx. 46 A' mzli ka, trtwzkaku nrkrdrdqgu kxmrna kx natwzku kalr Heven. A' mncbeku mz nrkrdrdqgu mz nrlc ka. 47 Adzm, kc tqngi ncblo kc kai vzpxm mz nrlc ka. A' Kxnmcpvz, kc tqngi ncblo kxmrna, vzpxm Heven. 48-49 Leplz keng tzvzpxmqng mz nqvi lr ncblo kc kai, nrkrdrdqdr bz x mibi, mz nzapu-krdr nide. A' nigu keng tzvzpxmqng mz nqvi lr ncblo kxmrna, nrkrdrdqgu sa nalu-along Heven, mz nzapu-krdr nide.

50 Mzlengeng x inwengeng, nayokaetipxbo dq da bamu. Mzli ka nrkrdrdqgu bz x mibi, x nrkrdrdq kxmule lc trpnzngr nzprtr-krde Heven mz nzlu-alo-krde elr.

51 Gct aelwapx-ngrmle bagu kx mzli kc nayzlu-ngrm Kxnmcpvz, kzdung kxnzrlxngit-

ing nalubeng. A' mzli lc kxznrlxngiting amrlx sa nalrtipx-aning, kxmule-esz' nzlubeng o nzbzpeng. <sup>52</sup> Murde kzdq kc enjrl sa navx-utrlle trpu kxrmnr-ngrbz, x mzli lcpwz leplz kxnbzpeng sa natulzpemqng mz nzlungr kxboi, x nrkrdrdq kxznrlxngiting amrlx sa nalrtipxng mz nrkrdrdq kxmrna. ✧ <sup>53</sup> Nrkrdrdq kcng tr-rblxu nzbz-krdr nalrtipxng mz nrkrdrdq kxmrna kx trznkrlzlru nzbzng. <sup>54</sup> X mzli lc tzlrtipxngr, sa na-atutrlle Nzryrngrkxtr kc tqrpilc kx, *Zmatq ngr nzbzng nzaovxio-along!*" ✧ Murde kxnbzpeng sa nalu-mopqng x trpengr kx nabz. <sup>55</sup> X narpi-kzku kx, *"Nzbzng nzo-datitx alo mz nzvecngr! X trpengr zmatq ngrde mz nzaetq-krde drtqgu."* ✧ <sup>56</sup> Murde zmatq ngr nzbzng mz nzaetq-krde drtqgu, vzpxm mz alwx rgung, mz nzrpiqr Loukxtr kx krkcng amrlx tzaleng alwx nabzng. <sup>57</sup> A' awi-ngrbzku mz Gct nzprtr-krbzku mz Kxetu rgu Jiszs Kxnmcpx mz nzaovxio-krde alwx x nzbzng, x trmnczpepwzkuu mz zmatq ngrdr.

<sup>58</sup> Mz nzmu-krde lcde, kx mzlengeng x inwengeng, bzkq vecpx-lzbqamu mz nzbtrikr drtwrmu Kxetu rgu, a' tu-amqngi-zvzamu. X rlrpx-lzbqamu mz nzwzng kc tqaprcbz Jiszs bamu, murde nzwz-krmu trnamaneu, a' rpilc kx nrade nayc-zvzbz.

## 16

### *Nzataktingr Trau Mz Nzwzkr Lrmakxtr*

---

✧ **15:52** 1 Tesalonika 4:15-17; Nzaelwapxng 10:7; 11:15

✧ **15:54** Asaea 25:8 ✧ **15:55** Hosia 13:14

<sup>1</sup> Mz letz scmu, rlxti-kzpa'mu bange nike na-aleamu mz nzatakqti-krmu trau kx na-atwzlr-ngrbzmu mz lr Jerusalem kxnzrlxngiting kx trpnzngr scdr da. X suti drtwrnge kx navz-nqblqamu da kx pipebo mz dzbe lrmakxtr kcng mz provins kc Galesia. <sup>2</sup> Mz Sade kang kqlu, mz nzmnc-krmu ma nyzmung, doa kx esz' mz nimu, nakapxle du trau mz nzwzngr lc, mz nzvz-nqblq-krde nike atatrple. X rtxlvzlvz zvz trau lc mz Sade kang kqlu, murde bzkq atakqtipeamu trau mzli kc navz-ngrmc. <sup>3</sup> Mzli kc nakaputr-ngrbo bamu, sa nayrbo du letz badr kztegun kxnzrlxngiting, murde letz lcng naokatr lr ncblo kcng tqmcpxamu mz nztwz-krbzlr trau scmung mz lr Jerusalem. <sup>4</sup> X nzmz kx tqmrlz kz nzvz-krgr badr, mwz sa navzkr badr ncblo lcdeng.

*Natq Ngr Nzvzpxkr Pol X Natq Kx Na-abrtzlvzngr Timoti*

<sup>5</sup> Sa naoklatimc nimu mz nibr nzoklati-kai-krnge kztegun mz provins kc Masedonia. <sup>6-7</sup> Murde nzmz naoklati-kaipc' nimu, nzmnc-krgr mzli mrbcnepwz. A' suti drtwrnge nzmnc-krgr mzli naboitx, kxmule-esz' temz kxli o tq nzmz kx tqrlr-ngrm Kxetu le. X mz nibrde, mrlz nzokatr-krmu ninge mz nzvzpx-krnge mou drlveke navzkix. <sup>8</sup> A' nzmnc-krnge mrka Efisz nakrlz bzle mzli kc tzmvlvzngr nzrlakilz-ngrm wit, zbq kc tqvzo-ngrm Mqngkrxtr. <sup>9</sup> Murde mzli ka ngi mzli kx mrlzpe mrka, mz nzyapwxtipx-krnge Nrpakxmrlz. Lepz nzkqlung kx nzabrtr-pebzlr drtwrdr mz Jisz. A' mzli lcpwz, leplz nzkqlu-kzng kx nzrpwa'-ngrmlr nzwz-krnge lc.

<sup>10</sup> Mzli kc Timoti nakrlz-ngrbzle nimu, abrt-zlvzamu nzvz-krmle x aclve-angidramu nide. Murde wzkr badr mz nzwzkr Gct, x takitrde nzamatq-krmu nide mz nzngini-kz-krde kxetu mz lrmakxtr.\*

<sup>11</sup> Bzkq obqsoamu nznginibe-krde obla. A' okatramu nidr badr kztedeng mz nzyzlu-mou-krmr bange. Murde obqtipxx nzmc-mou-krnge nidr.

<sup>12</sup> Mz letz scmu, rlxti-kzpa'mu bange nzatwzlr-krbo Apolos bamu mz nzalvztr-krde nimu. X apqtrpo drtwrde mz nzyzlu-krbzle bamu badr kztegunq kcng tztwzmlr letz scmu bange. A' rpile kx trsutiu drtwrde nzvz-krbzle bamu mzli ka, a' sa navzbz mzli kx takitrde.

### *Kzdung Kz Natq Mou*

<sup>13</sup> Aclvetio-lzbqamu! X tu-amqngi-zvzamu mz nzrlxngiti-krmu. Kxmule-esz' da kx prtz, a' nelzmu nabr. <sup>14</sup> Da amrlx kcng na-aleamu navz-nqblqle nqm q ngr nivz.

<sup>15-18</sup> Mzlengeng x inwengeng, abrtztx-ngrnge nzvz-krm Stifanas, Fortunatzs, x Akaekzs, mz nzkrz-krmlr ninge. Murde nzapqtrplr drtwrnge, da kc tzwai-zvzlr mz nzapqtr-krbzlr drtwrmu. X mrlzm bange nzxlr-krnge nrpa scmung.

A' mzli ka, mz nztwz-krbzlr letz scnge bamu, rngidrlvz-ngrbo bamu kx na-amatqamu ncblo kxnmulr lcng. Nadcp x drtwrmu kx Stifanas badr lr ma nyzde, nidr kx nzrlxngiti-ayrnng mz

---

\* **16:10** Pol trsutiu drtwrde nztrkkr nzmnc-krbz Timoti badr lr Korint. Murde krlz Pol kx kzdung lr Korint nzpctxpx-ngrdr Pol nzngini-krde aposol x nzngyatkr drtwrdr nide. [1 Korint 4:17; Aposol 19:22]



provins kc Akaia. X nzrlrpx-lz bqng mz nzokatr-krdr leplz neng Gct. Namnclz bzmz mz zmatq ngrdr badr kztedrng kcng tzaclveng badr.

*Natq Ngr Nzarlz-lz bqngr*

<sup>19</sup> Lrmakxtr kcng mrka mz provins kc Esia nzrpibzlr bamu kx, “Nimu la.” X Akwila badr olvz rde Prisila, x kxnzrlxngiting kcng tzyrlwr-lxblrng ma nyzdr mz nzangiong, nzrpi-kzlr kx nzmrlzti-zlwzlr nimu. <sup>20</sup> X kztengeng amrlx kcng tqwzkr badr nzrpi-kzpzlr bamu kx, “Nimu la.” X mzli kc tqrmcti-lz bqgamu, male-lxblramu mqmu mz nivz.

<sup>21</sup> Abzo mz ngalrde lc yr-angidrx mz mqnge. Ninge Pol rpibo bamu kx, “Nimu la.”

<sup>22</sup> Nadcpx mz drtwrmu kx doa kx trmrlztileu Kxetu mz nzvz-nqblq-krde natqde, namnclz bz mz nzrpilzng kc na-amncle nide mz Hxl kalr. X nakrka'-zvz-ngrgu kx, “Kxetu Jiszs, vz-anim!”

<sup>23</sup> X krka'-ngrne kx Kxetu rgu Jiszs naokatrle nimu mz zmrlz ngrde kxmyalz.

<sup>24</sup> Mrlztix nimu amrlx mz nzaxvctr-krbzku mz Jiszs Kxnmcpx.

Delape. Ninge Pol. †

---

† **16:24** 16:19 Mzli lcde Akwila x Prisila nzmncng Korint x nzkrly-angidrlr kxnzrlxngiting mrlcde. [Aposol 18:1-3] 16:22 Pol suti drtwrde kx natekqtrlr nqm q nr drtwrd, murde ma tzayrplapxng mz nyzlu-ani-krm Jiszs.

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 11 Nov 2022 from source files dated 30 Nov 2021

fb2b7f06-e254-5fb7-b59d-ee21d5d7a93f